



ՄԱՅՐ ԱՅԿԱԿԱՆ ՍՈՒՐԲ ԷԶՄԻԱԾՆԻ
ԿՐՈՆԱԿԱՆ, ՄԵԿԱՎՈՐԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ
Ամենայն Հայոց Կաթողիկոսն ընդունեց



Օգոստոսի 9-ին Մայր Աթոռում վերապատրաստման դասընթացների մասնակից եկեղեցականներին

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսն ընդունեց երեքշաբթյա վերապատրաստման դասընթացներին մասնակից քահանաներին, որոնք ժամանել էին Հայաստանի և Ափյուռքի տարբեր թեմերից:

Հանդիպմանը Նորին Սրբությունն իր հայրական օրհնությունը բերեց եկեղեցականներին՝ գոհունակությամբ արձանագրելով, որ դասընթացները հնարավորություն են ընձեռում քահանա հայրերին համախմբվելու Մայր Աթոռում, զորանալու Սուրբ Էջմիածնի առաքելության տեսիլքով, մեր սուրբ հայրերի ավանդած ժառանգությամբ, որոնք կերտել են հայ ժողովրդի փառքը, ինքնությունը:

Օգոստոսի 12-ին ՀԲԸՄ-ի «Բացահայտիր Հայաստանը» ծրագրի մասնակիցներին

Ամենայն Հայոց Կաթողիկոսն ընդունեց Հայկական բարեգործական ընդհանուր

ու դիմագիծը և ուղենշել ազգի հավիտենության ճանապարհը:

Իր խոսքում Հայոց Հովվապետը հորդորեց քահանա հայրերին մասնագրվել փոխգործակցությունը համայնքների միջև՝ իրենց հոգեխնամ առաքելությունն էլ ավելի արդյունավետ դարձնելու համար:

Վերջում Ամենայն Հայոց Կաթողիկոսը պատգամեց հոգևորականներին առավել մախանձախնդրորեն, անձնվիրաբար իրականացնել իրենց հովվական ծառայությունը՝ ազգի համար այս բարոյական օրհանգստով:

միության (ՀԲԸՄ) «Բացահայտիր Հայաստանը» ծրագրին մասնակից երիտասարդ հա-

յորդիներին՝ ուղեկցությամբ հայաստանյան ՀԲԸՄ-ի մախանձախնդրական կենտրոնական վարչության անդամ տիար Վազգեն Յակոբյանի:

Հանդիպմանը տիար Յակոբյանը, հայցելով Նորին Սրբության օրհնությունը, ընդգծեց, որ ՀԲԸՄ-ի «Բացահայտիր Հայաստանը» ծրագրի նպատակն է ուխտագնացությունների, ճանաչողական և մշակութային ծրագրերի միջոցով զորացնել աշխարհասփյուռ հայ երիտասարդների կապը հայրենիքի հետ, ծանոթացնել նրանց հայ մշակույթին և հոգևոր ժառանգությանը: Տիար Յակոբյանը տեղեկացրեց նաև, որ ծրագրի շրջանակներում երիտասարդ հայորդիները Հայաստանում մասնակցում են կամավոր մարդասիր-

րեգործական ընդհանուր միության կողմից իրականացվող մամոթիմակ ծրագրերը, որոնց շնորհիվ սփյուռքի հայ երիտասարդներին հնարավորություն է ընձեռվում ճանաչելու հայրենիքը, զորացնելու ազգային ոգին ու գիտակցությունը:

Հայոց Հայրապետը համոզմունք հայտնեց, որ երիտասարդները, հաղորդ դառնալով հայրենի իրականությանը և հայրենիքով առավել ներշնչված, իրենց կարողություններն ի սպաս կդնեն հայ ժողովրդի առջև ծառացած մարտահրավերների հաղթահարմանը և լուսավոր ապագայի կերտմանը:

Վերջում Վեհափառ Հայրապետը հայորդիներին պատգամեց մասնավորապես մնալ մախանձախնդրորեն, մախանձախնդրորեն:



րական ու համայնքային տարբեր ծրագրերի, այսօր էլ մախանձախնդրական կենտրոնական աշխատանքներ իրականացնել Մայր Աթոռ Սուրբ Էջմիածնում:

Իր օրհնությունն ու հայրական պատգամը բերելով ներկաներին՝ Ամենայն Հայոց Կաթողիկոսը բարձր գնահատեց Հայկական բա-

թյուն դրսևորել ազգային ինքնության պահպանման գործում և ակտիվորեն մերգործվել ազգային-եկեղեցական կյանքին:

Լրատվական նյութերը՝
Մայր Աթոռ Սուրբ Էջմիածնի
տեղեկատվական համակարգի

Ութսունամյա աստվածահաճո և ազգօգուտ գործունեությամբ
«Էջմիածին» ամսագրի 80-ամյակի առթիվ

1919 թ. իր արդյունավոր ու մեծարժեք գոյությունն է դադարեցնում Գևորգ Դ Մեծագործ Վեհափառի իմնադրած «Արարատ» ամսագիրը, և տասնամյակներ շարունակ Մայր Աթոռը մնում է առանց լրատու ու գիտելիքաբաշխ ազդարարի: 1944-ին՝ աշխարհակործան պատերազմի դժնի օրերին, Գևորգ Զ Հայրապետի նկարագրի, խոհեմության ու դիվանագիտության շնորհիվ եկեղեցամերժ ու անաստված անձայրածիր կարմիր կայսրության՝ հայության հոգևոր կենտրոնատեղիում ծնունդ է առնում ազգիս գլխավորագույն արքավայրի անվամբ մկրտված պարբերականը՝ «Էջմիածին» կրոնագիտական և հայագիտական ամսագիրը: Ամենայն Հայոց Կաթողիկոսության Մայր Աթոռ Սուրբ Էջմիածնի պաշտոնական ամսագիրն իր ուներին է առնում փառապանծ «Արարատ»-ի

թիկնոցը և ահա մի քանի տասնամյակ պատվով կրում է այն:

Առաջին խմբագիր է նշանակվում Առաքել Առաքելյանը, իսկ անդրանիկ համարի գեղարվեստական ձևավորումը կատարում է նշանավոր արվեստագետ, գեղանկարիչ Հակոբ Կոչոյանը, հաջորդ համարների ձևավորումը վստահվում է մանրանկարիչ, բեմանկարիչ Տարազորու Տեր-Վարդանյանին, ճարտարապետ Բաղդիկ Արզումանյանին, անվանի գեղանկարիչ Գրիգոր Խանջյանին:

Սուրճի ու մանգաղի իշխանության պայմաններում, սակայն, Հայ եկեղեցու նորահիմն պարբերականին, որի համարները պիտի ծանրաբեռն լինեին եկեղեցուն վերաբերող գրեթե արգասիքներով, փաստորեն չի թույլատրվում իրականություն դարձնել իր առաքելությունը: Լուսավորչի գահին ու

հավատավոր հայ ժողովրդին ծառայելու կոչված ամսագիրն սկզբնական շրջանում կրոնի, եկեղեցուն վերաբերող նյութեր գրեթե չի հրատարակում: Խմբագրությունն իր աշխատանքն ստիպված էր կատարել ժամանակի պետական-քաղաքական տրամադրությունները հաշվի առնելով, և միայն 1950-ական թթ. հնարավորություն է ստեղծվում նրա առաքելությունն իրականացնելու:

1956 թ. խմբագրական աշխատանքները պատշաճ կատարելու համար Վազգեն Ա Կաթողիկոսի տնօրինությամբ ամսագրի խմբագրությանը Մայր Աթոռ Սուրբ Էջմիածնում հատկացվում է առանձին գրասենյակ: Խմբագրությունը մասնատվում է Մայր Աթոռի հրատարակչի պարտականությունները՝ իրապարակ բերելով տասնյակների հասնող բազմատեսակ աշխատություններ:

Վազգեն Վեհափառի անմիջական մախանձախնդրությամբ և Մայր Աթոռի բարերար երվանդ. Աղաջանյանի հանգամանկությամբ Մայր Աթոռի տպարանը հանդերձավորվում է համապատասխան սարքավորումներով: Պարբերականի տպագրությունն անխափան իրականացնելու նպատակով 1961 թ. հոկտեմբերի 15-ին վերաբացվում է Մայր Աթոռի տպարանը: մինչ այդ «Էջմիածին»-ը տպագրվում էր երևանում:

Մայրեկեղեցական պարբերականի խմբագրին օժանդակելու, պարբերականի գիտականությունը նոր մակարդակի բարձրացնելու և հրատարակությունն առավել արդյունավորելու նպատակով 1965 թ. Վազգեն Հայրապետի մախանձախնդրությամբ ստեղծվում է խմբագրական խորհուրդ:

Ութսունամյա աստվածահաճո և ազգոգուտ գործունեությամբ

← էջ 5

2018 թվականից սկսած, Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի բարձր տնօրինությամբ, «Էջմիածին» ամսագրի խմբագրության աշխատանքները համակարգում է Մայր Աթոռ Սուրբ Էջմիածնի հրատարակչական բաժինը (տնօրեն՝ Տեր Արարատ քհն. Պողոսյան): Պարբերականի տպագրի օրինակներն առաքվում են Հայաստանի և արտերկրի մի շարք գրադարաններ, թվային տարբերակները՝ տեղադրվում համացանցային հատուկ կայքերում, առցանց շտեմարաններում:

Հայոց հոգևոր մայրաքաղաքում ամսետմեսիս ի լույս բերվող 80-ամյա գրային ամփոփարանը հիմնականում ի պահ է վերցնում հայ եկեղեցական կյանքի հիշարժան դրվագներ, աստվածաբանական և հայագիտական հոդվածներ: Պարբերականի էջերը մեզ ներկայացնում են՝ հայրապետական կոնդակներ, քարոզներ, ճառեր, ելույթներ, նամակներ, ողջունագրեր, հեռագրեր, մահագրականներ, վճիռներ, լուսաբանումներ՝ Վեհափառի արտասահմանյան ուղևորությունների, ինչպես և միջեկեղեցական զարգացումների, Էջմիածին-Ամթիլիս հարաբերությունների, Հայ եկեղեցու բարեկարգության, եկեղեցիների կառուցման, վերակառուցման ու վերաբացման, քրիստոնեական դաստիարակության կենտրոնների հիմնման, ձեռնարկությունների, սփյուռքյան իրադարձությունների, Գևորգյան հոգևոր ճեմարանի, Սևանի Վազգենյան հոգևոր դպրանոցի և Կալկաթայի Մարդասիրաց ճեմարանի կյանքի, Հայոց ցեղասպանությանը նվիրված ժողովների մասին, նաև ցեղասպանությանը վերաբերող հայ անվանի գործերի երկեր, չափածո գրականություն և այլն:


Հայ եկեղեցական կյանքի հիշյալ լուսաբանումները, որ տվյալ ժամանակահատվածում ունեն իրազեկային նշանակություն, հետագայում ձեռք են բերում սկզբնաղբյուրային արժեք, ասել կուզի՝ «Էջմիածին»-ը նաև աղբյուրագիտական դերով է արժեքավոր. իբրև Հայ եկեղեցու, նաև հայոց պատմության մասին տեղեկություններ պարունակող գրային պաշար՝ այն զանազան ուղղությամբ համար, ինչպես իր փառահեղ նախորդը՝ «Արարատ»-ը կամ մեր միջնադարյան գրավոր հիշատակարանները: Հայ եկեղեցու վերջին 80 տարվա կյանքը «Էջմիածին» պարբերականի

շնորհիվ այլևս համագամորեն գրառված-փաստագրված-ամսահացած է, գրո հիշատակմամբ ի պահ է տրված մտքի հերկ անող սերունդներին, և շարունակվում է այս գրառում-փաստագրում-ամսահացումը: Եվ եթե հետագա տարիներին ու դարերին Հայ եկեղեցու անցյալը քննող մտքի որևէ մշակ գրիչը ձեռքն առնի և կամենա պեղել եկեղեցու՝ 1944-ից սկիզբ առած պատմաշրջանը, ապա հայացքն առաջին հերթին պիտի ուղղի «Էջմիածին» պարբերականին՝ իբրև իր օրեր հասած արժեքաբանական անգին ժառանգության, սրբաթաթախ գիտելիքակիր նշխարանոցի:

Հոբելյար պարբերականը չի ամփոփվել եկեղեցու պատերի մեջ, անդրադարձներ է արել, մասնակիցը եղել հայության համար նշանակալի իրադարձությունների՝ ներգաղթ, Արցախյան պայքար ու ողբերգություն և այլն: Խորհրդային դարաշրջանում, երբ ազգայինը, մեղմ ասած, չէր խրախուսվում, «Էջմիածին»-ը լիաբեռն համարներ էր լույս ընծայում Հայոց ցեղասպանության վերաբերյալ: Իր գոյության 80 տարիներին այն ասպարեզ է բերել համազգային նշանակություն ունեցող եկեղեցական ու պետական տոներին և հիշատակի օրերին մվիրված բազմաթիվ բացառիկ համարներ, անդրադարձել հոբելյանների:

Ամսագիրը հայագիտության անդաստանի բերքահավաքներից ու բերքաբաշխներից է. լույսընծայման առաջին իսկ օրվանից մինչ օրս իրենց մտավոր որոնումների ծնունդը նաև «Էջմիածին»-ի պարբերական լուսաբերումներով են հայագիտական համայնքին ի ցույց դնում և դեպի անմահություն ճանապարհում հայագիտության ու Հայ եկեղեցու տարասերունդ մեծաթիվ ներկայացուցիչներ հայրենիքից ու սփյուռքից, այդ թվում՝ մի ողջ աստղաբույլ՝ Հրաչյա Աճառյան, Ստեփան Մալխասյանց, Արշակ Ալադյանյան, Երվանդ Շահագիզ, Գարեգին Լևոնյան, Լևոն Մելիք-սեթ-Բեկ, Կարո Ղաֆադարյան, Երվանդ Տեր-Սիմոնյան, Գևորգ Զ Չոռեքչյան Կաթողիկոս, Մեծի Տանն Կիլիկիո Գարեգին Ա Յովսեփյանց Կաթողիկոս, Վազգեն Եպիսկոպոս Պալճյան (Ամենայն Հայոց Վազգեն Ա Կաթողիկոս) և այլք:

«Էջմիածին»-ը ընթերցողներին ու հետազոտողներին հրաժեմուն է արխիվային նյութեր, հուշեր, նամակներ: Պարբերականի էջերում տեղ է տրվում Մայր Աթոռ Սուրբ



Էջմիածնի նորաստաց ձեռագրերի գիտական ցուցակին, ինչպես և այլ ձեռագրերի համառոտ նկարագրությունների: Ամսագրի միջոցով հայագետների սեփականությունն են դառնում մեր միջնադարյան մատենագիրների մի շարք անտիպ գործեր: Հայ միջնադարյան հուշարձանների արձանագրությունների հրատարակումը ևս առանցքային տեղում է լինում: Թարգմանաբար ներկայացվում են նաև հայ մատենագրության հետ սերտորեն կապված այլաեզու աշխատանքներ: «Էջմիածին» պարբերականն ընթերցողին բաժին է հանում նախնյաց բարձրարժեք մտավոր պաշարի նշխարներից՝ բազմաթիվ արտատպություններ «Արարատ», «Հասկ», «Շողակաթ», «Սիոն», «Հայաստանյայց եկեղեցի» հանդեսներից, անվանի հոգևոր այրերի քարոզների վերահրատարակություններ: Ամսագրի էջերը բովանդակում են նաև հայ և այլազգի հայագետների կյանքին ու գիտական ժառանգությանը վերաբերող հոդվածներ, նրանց հայագիտական գործերի մատենագիտությունները:

«Էջմիածին»-ը չի մոռանում իր փառապանծ նախորդին՝ «Արարատ»-ին. 1968 թ. լույս է ընծայում նրա հարյուրամյակին նվիրված բացառիկ, պերճաբովանդակ համարը, իսկ 1968—1970 և 1973—1974 թթ.՝ «Արարատ» ամսագրի 50 տարվա և «Էջմիածին» ամսագրի 30 տարվա նյութերի մանրակրկիտ մատենագիտությունները: Եվ իբրև այս ամենի տրամաբանական շարունակություն ու վերջնակետ՝ լույս աշխարհ է բերում իր և իր նախորդի մատենագիտությունները՝ «Մատենագիտություն «Արարատ» ամսագրի» հայ պարբերական մա-

մուլի պատմության մեջ առաջին լիակատար և օրինակելի մատենագիտությունը (կազմող՝ Սեդա Կոծինյան, խմբագիրներ՝ Սուրեն Քոլանջյան, Արթուր Հատիսյան, Էջմիածին, 1970), «Մատենագիտություն «Էջմիածին» ամսագրի» (կազմող՝ Սեդա Կոծինյան, խմբագիրներ՝ Արթուր Հատիսյան, Սուրեն Քոլանջյան, Սուրբ Էջմիածին, 1975), «Մատենագիտություն «Էջմիածին» ամսագրի (1974—2008 թթ.)» (կազմող՝ Տեր Արարատ քահանա Պողոսյան, խմբագիր՝ Գևորգ Տեր-Վարդանյան, Սուրբ Էջմիածին, 2012). մշտավառ փառսներ հայագիտության տարբեր հորիզոններում որոնումների ելած գանձախույզների համար: Ամսագրում տեղ գտած մի շարք հոդվածաշարեր հրատարակվում են իբրև առանձնատիպ:

1956 թվականից ի վեր «Էջմիածին» ամսագրի խմբագրությունն է պատրաստել և հանրության սեփականությունը դարձրել կրոնական, եկեղեցագիտական, ճանապարհորդագրական, պատմաբանասիրական բնույթի մի քանի տասնյակ ամուս գիրք: Հայաստանի անկախացումից հետո ամսագրի պատմաբանասիրական բնույթն ավելի է ընդգծվում:

Այս ամենի մեջ մեծ ու նշանակալից է եղել և այսօր էլ կա խմբագիրների դերը, որ տասնամյակներ շարունակ կազմակերպել և ուղենշել են մայրեկեղեցական պարբերականի ընթացքը, հաղթահարել նրա առջև ծառացած խոչընդոտները, պաշտպանել նրա տեսակը: Խմբագիրներից յուրաքանչյուրն իր անձամբի աշխատանքն է դրել ամեն մի համարի կայացման հիմքում, իր աղյուսն ավելացրել «Էջմիածին» ամուսը կրող 80-ամյա փառահեղ ու լուսաբեր շտեմարանի հիմնապատին. հիշատակենք նրանց անուն առ անուն՝ Առաքել Առաքելյան, Լևոն Կիսաբեկյան, Աշոտ Աբրահամյան, Արթուր Հատիսյան, Պարզ Ծախբազյան, Երվանդ Մելքոնյան, Տեր Ասողիկ Եպիսկոպոս Արիստակեսյան, Տեր Բագրատ արքեպիսկոպոս Մարիամ Վարդանյան, Տեր Արշակ արքեպիսկոպոս, Անդրանիկ Ջեյրոնյան, Վարդան Դևրիկյան, Արշակ Մադոյան, Արսեն Բոբոյան, Հայր Անդրեաս արքեպիսկոպոս, Գևորգ Մադոյան:

«Էջմիածին» ամսագրի շտեմարան էր և Հայ եկեղեցու ու հայ մամուլի պատմության մեջ: Հայոց Հայրապետների՝ առ հավատա-

ցյալ հոտն ուղղված խոսքի, Հայ եկեղեցու կյանքի, հայ ժողովրդի քրիստոնեական հավատքն ամուր պահելու և հայ գիտության ծառաների ժողոված հունդի բաշխման ու հավերժի ի պահ տրման հիմնական միջոցներից է Էջմիածնահիմն այս պարբերականը, Հայ եկեղեցու ու հայ ժողովրդի ուրախ և տխուր օրերի, անկումների ու խոյանքների, կրոնատների ու ձեռքբերումների ակամատեսն ու վկան, նաև լույսի հաղթանակն ու խավարի հալածմանը նպաստողներից: Այո, դար ու դարեր առաջ Սուրբ Մեսրոպի ու Սուրբ Սահակի օրհնաբեր աջով Հայոց աշխարհում սփռված լույսն այսօր նաև «Էջմիածին»-ի միջոցով է շարունակվում իր առաքելությունը:

Այսպիսով՝ տասնամյակներ շարունակ «Էջմիածին»-ը ամենամայա պարբերականությամբ հավաքում է Էջմիածնական կյանքի նորություններն ու հայագիտության անդաստանի պտուղները և բաշխում հոգու հացով ապրող, մտքի նվաճումներով ու հարստացումով ուրախացող հանրությանը, իր բաժին մեծ ջանքն ի գործ դնում ճակատագրի անողորմ հարվածով երկատված, աշխարհով մեկ սփռված հայության միասնությունն ամրապնդող պահելու առաքելությամբ մեջ:

Այսպիսին է «Էջմիածին» ամսագիրը՝ հայ եկեղեցական ու հայագիտական կյանքի կարևորագույն իրադարձությունների, ձեռքբերումների վկան, արձանագրողն ու ազդարարողը: Իր մեծ նախորդի՝ «Արարատ»-ի նման մա է դարձավ առաքելախառնատա Հայ եկեղեցու տարեգիրը, հայելի, որ արտացոլում է հայ հոգևոր-մշակութային կյանքի վերջին ութ տասնամյակի պատկերը:

Մաղթենք ու ջանանք, որ իր արդյունավոր ընթացքի հարյուրամյակը «Էջմիածին»-ը դիմավորի առատ արարումներով ծանրաբեռն, արժեքատեղծ նոր հարյուրամյակներ նվաճելու վճռականությամբ առաջնություններով և իրադարձություններով: Թող հայ եկեղեցական ու գիտական մամուլի՝ «Էջմիածին»-ին հատկացված գրադարակն անընդմեջ համալրվի Էջմիածնական մայր պարբերականի լուսապարզ և համարներով: Թող հարյուր, երկու հարյուր, երեք հարյուր և բազում այլ հարյուրամյակներ անց էլ «Էջմիածին»-ը մեր առջև հառնի իբրև Հայ եկեղեցու ու հայ գիտության բարի ավետաբեր: Ամեն:

Հրաչյա ԲԱԼՈՅԱՆ (Արմենյան),
Բ. Գ. Բ.

ՔՐԻՍՏՈՆՅԱՆ ԲԱՐԵԿՐԹՈՒԹՅՈՒՆ

Սուրբ Անդրե գորավարի և նրա բանակի, Կալինիկոս և Դոմենտիոս վկաների հիշատակությունը

«Բայց այս բոլորից առաջ ձեզ պիտի ձերբակալեն և հալածեն, ատյանների ու բանտերի պիտի մատնեն ձեզ և կուսակալների ու թագավորների առաջ պիտի տանեն ձեզ իմ անվան համար: Եվ այդ ձեզ համար պիտի լինի առիթ վկայության»

(Դուկ. 21:12—13):

Այս խոսքերով Աստծո Որդին կանխատեսեց խաչի ճանապարհով ընթացողներին՝ Իր խոսքին հավատացողներին և դրա քարոզիչներին սպասող փորձությունները: Տեր Հիսուս Քրիստոս Իր գալուստով այս երկրի վրա երբևէ խաղաղ և անհոգ կյանք չխոստացավ մեզ, այլ՝ հալածանք, պայքար, անձնագոհություն Իր անվան համար: Թե՛ առաքյալները և առաջին քրիստոնյաները, թե՛ երկուհազարամյա պատմություն ունեցող քրիստոնեական եկեղեցին մշտապես Քրիստոսի խաչի թշնամիների կողմից հետապնդումների

և բռնությունների են ենթարկվել: Նրանք իրենց կյանքով և թափած արյունով են խոստովանել առ Աստված ունեցած անաղարտ և սուրբ հավատը՝ առանց երկնչանքի և տարակուսանքի: Նահատակների մասին գրվել են վարքեր և վկայաբանություններ, որոնք դարերի ընթացքում դարձել են քրիստոնյաների համար կյանքի ապրման կատարելատիպ և լավագույն օրինակ: Այսօր էլ քրիստոնեական եկեղեցին շարունակում է տոնախմբել կամ հիշատակել հանուն Քրիստոսի հավատի անձնուրաց գործած սրբերի

և նահատակվածների անունները՝ փորձելով քրիստոնյա հավատացյալին փոխանցել այն առանձնահատուկ առաքելությունները, որ դրսևորվել են նրանց կողմից: Նմանատիպ հիշատակություններից է Ս. Անդրե գորավարի և նրա բանակի, Կալինիկոս և Դոմենտիոս վկաների օրը:

Դեռևս հեթանոս Հռոմեական կայսրությունում քրիստոնեության տարածումից ի վեր մեծ չափերի էին հասնում քրիստոնյաների հանդեպ հալածանքները՝ Ներոն կայսրից (54—68 թթ.) մինչև Դիոկղետիանոս (284—305 թթ.) և Դուլիանոս Ուրացող (361—363 թթ.): Այդ հալածանքները սաստկացան հատկապես Դիոկղետիանոս և Մաքսիմիանոս կայսրերի օրոք, որոնք ջանում էին մարել հավատքի լույսը և վերացնել քրիստոնեական պաշտամունքը՝ մահվան սպառնալի-

քով ստիպելով բոլոր հավատացյալներին երկրպագել հեթանոս կուռքերին: Չնայած նրանց չարական մտադրությանը՝ եկեղեցին էլ ավելի էր հզորանում, ինչպես Պողոս առաքյալն է ասում. «Դրա համար էլ գոհ եմ ի սեր Քրիստոսի կրած իմ տկարությունների, նախատիքների, վշտերի, հալածանքների և մեղությունների համար, որովհետև երբ տկար եմ, այն ժամանակ եմ զորավոր» (Բ Կորնթ. 12:10):

Դիոկղետիանոս և Մաքսիմիանոս անօրեն կայսրերի օրոք է ապրել Ս. Անդրեաս գորավարը, որը ծագումով Կիլիկիայից էր և որպես կայսերական բանակի հրամանատար՝ ծառայում էր Ասորիքում: Նա հայտնի էր քաջարի և տաղանդավոր զինվորականին բնորոշ հմտություններով և շնորհներով: ➔ էջ 3, 5

Սուրբ Անդրե գորավարի և նրա բանակի, Կալինիկոս և Դոմենիոս վկաների հիշատակությունը

← էջ 2

Պարսկական բանակի հերթական ներխուժման ժամանակ Ասորիքի կառավարիչ Անտիոքոսը նրան և նրա հինգ հարյուր ինքնուկուր թաղերին է վստահում թշնամական բազմահազարանոց զորքերին կանգնեցնելու համաձայնությունը: «Քո արիության ու քաջության համբավը ամեն կողմում տարածված է, քանի որ բոլոր պատերազմների հաղթական ավարտը քեզին իմացան բոլոր մարդիկ, որի համար և այդպիսի պատվի արժանացար և հիմա առավել կցուցադրես այս պատերազմում քո հաղթական քաջությունը, որ ավելի պատվի, գովեստի ու մեծարման արժանանաս» (Վարդ Սրբոց, հատոր Ա, Էջմիածին, 2009, էջ 111):

Ս. Անդրեն, Աստծո օգնականությունը հուսալով, ընդունում է իշխանի հրամանը և իր հետ վերցնելով իրենց քաջությամբ հայտնի մարդկանց՝ ընդառաջ գնում թշնամուն: Փոքրաթիվ զորքը, հակառակորդի բազմությունը տեսնելով, վախի և խուճապի մեջ է ընկնում: Սակայն արիասիրտ և աստվածապաշտ զորավարը, լցված Սուրբ Հոգով, քաջալերվում է և այսպիսի կոչով դիմում իր զինվորներին: «Եղբայրներ, եկե՛ք և առ Աստված դառնալու, կուռքերի մոլորությունից հրաժարվելու և երկրի Աստծուն հավատալու ժամանակը, Որի



Ս. Անդրե գորավար

ծեռքին են բոլոր հաղթանակները: Ժամանակն է Բարձրյալից հայցել վերին օգնականություն և փրկություն, որովհետև Նա կենդանի ու կենդանարար Աստված է, ամենքի Արարիչը և անհաղթելի Թագավորը: Նա օգնական է բոլոր նրանց, ովքեր դիմում են Իրեն, և Նա է, որ փրկում է բոլոր նեղություններից: Արդ, այսուհետև հավատացե՛ք ամենասուրբ Երրորդությանը՝ Հորը, Որդուն և Սուրբ Հոգուն, և այդ հավատքով մտեք պատերազմի մեջ» (Վարդ Սրբոց, էջ 111):

Լսելով զորավարի գոտեպնդող խոսքերը՝ բոլորն իրենցից վանեցին երկյուղը ու տագնապը, նրանց մտքերը լուսավորվեցին, և խոստովանեցին հավատը Սուրբ Երրոր-

դության հանդեպ: Ինչպես Հեսու Նավեն, Անդրե գորավարն ու նրա զինվորներն ապավինեցին Աստծո զորությանը և հավածեցին ու փախուստի մատնեցին թշնամու բյուրավոր զորքին: Փառավոր հաղթանակը կերտված էր: Սակայն կռապաշտ Անտիոքոս կուսակալը իմանալով, որ զորքը գովերգում է Աստծուն և Նրան վերագրում հաղթանակի փառքը, սաստիկ զայրանում է և լցվում չար խորհուրդներով: Երբ սուրբն ու իր զորականները գալիս են քաղաք, մեծ ոգևորությամբ պատմում էին, թե ինչ հրաշքով հաղթանակ տարան, սակայն ապերախտ Անտիոքոսը կարծրացրեց իր սիրտը և չցանկանալով լսել նրանց՝ սկսեց հնար փնտրել Տիրոջը խոստովանողներին ճշմարիտ հավատից հեռացնելու համար: Անկարող լինելով տարհանո՞ղ՝ կուսակալը որոշեց նրանց աքսորել և երկու հազար զինվորների ուղեկցությամբ դուրս բերեց քաղաքից, իսկ Աստծո սուրբ բանակը հնազանդությամբ համաձայն ալո չարչարանքները: Ճանապարհին զորավարը շարունակում էր քարոզել Աստծո խոսքը և կոչ անել անհողողող մնալ հավատի մեջ: Տեսնելով ու լսելով նրանց՝ կուսակալի երկու հազար զինվորները զղջացին իրենց սրտերում և ծանաչեցին Կենդանի Աստծուն: Բոլորը, փառք տալով Աստծուն, ծա-

նապարհ ընկան դեպի Կիլիկիա՝ չկամենալով այլևս վերադառնալ Անտիոքոսի մոտ:

Այս ավետիսը գույժ եղավ կուսակալի համար, որը հաստատ մնալով իր որոշումներում և գործերում՝ նամակ հղեց Կիլիկիայի կառավարիչ Սելևկիոսին և պատվիրեց նրան ոչնչացնել զորավարին և նրա սուրբ բանակը: Իսկ վերջինս գազանալիմ հրճվանքով համաձայն ալո անաստված գործը: Այդ ընթացքում երանելի Անդրե գորավարն իր զորքի մեծ բազմությամբ գնաց Կիլիկիայի Տարսոս քաղաք, որտեղ հանդիպեցին քաղաքի Պետրոս և Բերիա քաղաքի Նունոս եպիսկոպոսներին ու մկրտվեցին նրանց ձեռամբ Հոր, Որդու և Սուրբ Հոգու անունով: Երբ Սելևկիոսն այս բանը լսեց, չարությունից այլազուրկվեց և թունավոր իժի պես մեծաթիվ զնդով սկսեց հավածել Աստծո սուրբ բանակը՝ ցանկանալով բոլորին անխնա կոտորել: Բայց սրբերը, ճշմարտության հաստատականությունն ունենալով, հզոր բազկով հարվածում էին թշնամուն այնպես, որ վերջիններս չէին կարողանում ծակատ առ ծակատ կռվել նրանց դեմ:

Տեսնելով, որ մարտնչելով հնարավոր չէ հաղթել, Սելևկիոսը փակեց լեռնանցքը և դարանակալեց, իսկ Ս. Անդրեն բանակեց ձորամիջում: Քաջակրող զորավարը հասկանալով, որ վճռորոշ պահը

մոտեցել է, եկել է նահատակության սուրբ վայրկյանը, դիմում է իր զորքին այս խոսքերով. «Եղբայրներ, իմ սիրելի և քաջ միզակակիցներ, ահա ժամը արիաբար քաջանալու և հաճո լինելու երկնավոր Թագավորին. ահա ժամը մարտի և հաղթության, որ անթառամ պսակի արժանանանք: Այսուհետ հաստատուն մնացե՛ք մեր Տեր Հիսուս Քրիստոսի հավատին, պինդ բռնեցե՛ք շնորհը, որ ձեզ տրվեց, հիշեցե՛ք երանավետ պարգևները՝ ձեզ խոստացած Տեր Հիսուս Քրիստոսից: Ձեզինց ոչ մեկը մտքով չշեղվի ընկալյալ շնորհներից, ոչ մեկը հավիտենական կյանքից չզրկվի՝ ցանկանալով երկրային կյանք: Հասե՛ք ենթ գավթի դուռը, ոչ մեկը հետ չդառնա և վրիպի հարսանյաց առագաստից: Բարվոք պատերազմը պատերազմեցինք և ահա պատրաստ ենք հատուցման վարձքին, և շուտով Թագավորը երկնային փառքով պսակելու է մեզ: Ցանկալի է մեռնել մեր Տեր Հիսուս Քրիստոսի անվան համար, որ նրա հետ կենդանանանք և փառավորվենք անձառ ու անապական բարիքով: Ցանկալի է այս սնտուխ և ապականացու կյանքը փոխանակել անմահական կյանքով, ցանկալի է ուրանալ աշխարհական մեծությունները, որ հանդերձյալում շահենք բազմապատիկ արդյունք, մեկին՝ 30, մեկին՝ 60, մեկին՝ 100 ու առավել ևս»: ➔ էջ 5

ՆԱԽԷ... ԱՆՍԿԻԶԲ ՈՒ ԱՆՎԵՐՋ, ԱՆՔՆԻՆ ԵՎ ԱՆԸՍԳՅՈՒՏ...

Բարու և չարի գիտության ծաղր

«Տերը՝ Աստված, պատվիրեց Ադամին՝ ասելով. «Դրախտում եղած ամեն մի ծառից կարող ես ուտել, բայց բարու և չարի գիտության ծառից մի՛ կերեք, որովհետև այն օրը, երբ ուտեք դրանից, անպայման կմեռնեք»

(Ծննդոց 2:16—17):

Աստծո կողմից մարդուն տրված առաջին պատվիրանն առնչվում է պտղատու ծառերի մեջ ընտրություն կատարելուն: Մարդկության պատմության հետագա ընթացքը ցույց է տալիս, որ տարբար կենցաղային հրահանգի խախտումը հանգեցնում է մեծագույն ու անդառնալի իրողությունների, որոնք պատճառ են դառնում ներդաշնակության խաթարման, երջանկության կորստյան, մարդկային հոգու ցավերի, ֆիզիկական աշխարհի տիրապետության, հոգևոր քաղցի անհագուրդության և աստվածային հայացքի մշտատանջ որոնումների:

Հրեական ընկալումներում դրախտում տնկված բարու և չարի գիտության ծառի որոշակիության վերաբերյալ միակարծությունը բացակայում է. ռաբբիների և հրեա կրոնագետների մոտեցումները խիստ տարբեր են և պայմանական: Հրեական ավանդություններում բարու և չարի գիտության ծառը նույնականացվում է ցորենի, շաղգամի, խաղողի որթի, կիտրոնի ծառի և թզենու հետ:

Քրիստոնեական եկեղեցական ավանդության մեջ բարու և չարի գիտության ծառը հիմնականում դիտարկվել է հոգևոր-խորհրդածական հայեցողության լույսի ինքը: Օրինակ՝ Սուրբ Գրիգոր Նազիանզացին «Ձատկի մասին» ճառում գրում է, որ գիտության ծառը իմացության, մտորումների խորհրդանշական անվանումն է: Մաքսիմոս Խոստովանողն այն անվանում է «ճանաչողության ծառ», որը մարմնապես և զգայապես ճաշակելը

հանգեցնում է անմտության, հոգևոր ճանապարհից խտորման: Այդ ծառից ճաշակելուց հետո է, երբ բարի կամքի և աստվածային ուղղորդման կողքին տեղ է գտնում մարդկային մեղանշական կամքը՝ բարու և չարի ճանապարհների ընտրության հնարավորությամբ:

Հրեական մեկնություններում և քրիստոնեական վաղ ավանդագրույցներում բարու և չարի գիտության ծառը հաճախ է նույնականացվել խնձորենու հետ: Պատճառը լատիներենում առկա բառային նմանությունն է. *malum* նշանակում է խնձոր, իսկ *malus*՝ չար: Քրիստոնեական պարականոն (ապոկրիֆ) գրականության մեջ բարու և չարի գիտության ծառի վերաբերյալ գոյություն ունեն մի շարք թափառող պատմություններ, ավանդազրույցներ, ըստ որոնց՝ այդ ծառից մի ճյուղ հրեշտակապետը հանձնել է Սեթին՝ Ադամի որդուն, որն էլ այն տնկել է հոր մահացած վայրում, որտեղ աճած ծառից պատրաստված փայտի վրա էլ հետագայում խաչել են Քրիստոսին:

Եթե մենք ցանկանում ենք հասկանալ Կենաց ծառի և բարու ու չարի գիտության ծառի նշանակությունը դրախտային այգում, մենք պետք է դրանք քննենք արարչական կարգի շրջանակում: Ծառերը բույսերի և սերմերի հետ միասին կենդանանում են Աստծո խոսքով արարչագործության Երրորդ օրը՝ որպես արարչագործության հաջորդականության շղթա (Ծնն. 1:11—12): Ջրերում և ցամաքում աճող մյուս բուսականության հետ մեկտեղ ստեղծված ծառերը սերմացու են և պտղաբեր: Աստված մարդկությանը տալիս է բույսերը և ծառերի պտուղները՝ որպես կերակուր. «Աստված նաև ասաց. «Ահա ձեզ իբրև կերակուր տվեցի սերմ տվող սերմանելի բույսերը՝ տարածված ողջ երկրի վրա, և իր պտուղի մեջ սերմանելի սերմ ունեցող բոլոր ծառերը»» (Ծնն. 1:29): Հետևաբար՝ յուրաքանչյուր

պտղաբեր ծառ և սերմնատու բույս պետք է լինեին Ադամի ցեղի կերակուր:

Եդեմի պարտեզի երկու ծառերը թեև եզակի են աշխարհի ծառերի ու բույսերի մեջ, այնուամենայնիվ, իրենց տեսակին համապատասխան՝ որպես պտղատու ծառեր, կերակուր միջոց են: Աստված ծառերը դնում է այգում և թույլ է տալիս, որ ճաշակեն Կենաց ծառի պտղից, բայց արգելում է ուտել բարու և չարի գիտության ծառից: Սա կամայական պարտադրանք և արգելք չէ, այլ արդեն իսկ լավ հռչակված բան՝ սահմանափակում, որը տրվել է մարդկությանը՝ մեր սպառնալից համար: Այստեղ Արարչի կողմից մարդուն ուղղված հրամանը բոլորովին տարբերվում է նախորդ գլխում կենդանիներին ուղղված օրհնություններից: Պարտադիր չէր, որ այս օրհնություններն ըմբռնվեին, որպեսզի կիրառվեին, քանի որ Նա, Ով դրանք արտասանեց, տվեց դրանց իրականացման համար անհրաժեշտ բնագոյներն ու գործությունները: Ուրեմն, լեզուն հասկանալու կարողությունն ի սկզբանե դրված էր մարդու կառուցվածքում, և պահանջվում էր միայն այն արտասանել Աստծո հստակ ձայնով: Մարդն այժմ խոսքի տեսության վարպետ է. նշանի հասկացությունը փոխանցվել է նրա մտքին: Մարդու ֆիզիկական կազմավորումը հայտնվում է «ուտելու» գործընթացում: Նրա էության բարոյական մասը տեղ է գտնում «կարող է» և «չպետք է» բառերի նշանակության մեջ: Արարքների և իրերի մեջ արժեքների տարբերակումն արտահայտվում է «բարի» և «չար» բնորոշումներով: Պարզևստիման հասկացությունը փոխանցվում է «կյանք» և «մահ» եզրույթներով: Եվ, վերջապես, «Տեր Աստծո» ներկայությունն ու իշխանությունը ենթադրվում են հենց պատվիրանի բնույթով: Մարդը պետք է կրի Աստծո պատկերը ըմբռնողական ուժերով, ուշադիր հայացքով պետք է



Ադամը և Եվան, Թորոս Տարոնացի, 1318 թ., Գլանդ

գննի իրականության բազմազան տեսարաններում ամենաբարձրը, ինչպես նաև ամենացածրը:

Եդեմի պարտեզում գտնվող Կենաց ծառը Աստծո աջակցող զորության պարզևն է: Նրանք, ովքեր ուտում են դրանից, ապում են հավիտյան (Ծնն. 3:22): Ի սկզբանե մարդկությունն ավելին էր, քան կենսաբանական էություն, հողեղեն արարած լինելը: Ի սկզբանե մարդուն ավելին էր պետք, քան սնունդը՝ ապրելու համար, քանի որ մարդն Աստծո կարիքն ունի, և առանց Աստծո և Նրա սուրբ խոսքի պահպանության՝ անգործ և կյանքի իմաստի մեջ խորամուկս լինելու և բանաձևելու մարդկային կյանքի նպատակը: Այլ կերպ ասած՝ «մարդը միայն հացով չի ապրում, այլ այն ամեն խոսքով, որ ելնում է Աստծուն բերանից» (Բ Օրին. 8:3): Երբ Ադամը և նրա ցեղակիցները ճաշակում էին աստվածատունկ այգու ծառերից, որոնք ուտելի էին, նրանք կենսաբանորեն մորոգվում էին, մարմնապես առույգանում (ֆիզիկական գոյավիճակ): Կենաց ծառից ուտելով՝ նրանք ստանում էին ներքին և հոգևոր մորոգություն, հավերժական կյանքով լիություն և Աստծո հետ հաղորդակցության, Նրա բարության մեջ հարատևելու զգացումներ (հոգևոր գոյավիճակ): Մեղանչելուց հետո Կենաց ծառը

հանվում է մարդու ճաշացանկից՝ ի բարորություն իրեն: Եթե Ադամը, Եվան կամ նրանց զավակներից որևէ մեկը, մեղանշած և փառքից ընկած լինելով (Հռոմ. 3:23), օգտվեին այդ ծառից, նրանք կունենային անվախճան կյանք, բայց աշխարհային այդ հավիտենությունը կլինեք դատապարտված և անհաված պայմաններում՝ հավերժ զրկված փրկագնումից: Պարզ ասած՝ նրանց օրերի տևողությունը միայն ընդլայնված թշվառություն կլինեք, նրանց հավերժ ապրելը կսեղանի դժոխք կլինեք: Կենաց ծառից ուտելը կասեցնելով Աստված կանխահայտնեց իր փրկագնման ծրագիրը, որն Աստծով կյանքի հնարավորությունն է: Մինչդեռ բարու և չարի գիտության ծառից արգելվում է ուտել: Այս պատվիրանն իր հետ բերում է իստականք, որ այն օրը, երբ Ադամն ուտի դրանից, նա կմահանա (Ծնն. 2:17): Այն, ինչպես մյուս ծառերը, հաճելի էր աչքին և օգտակար էր ուտելու համար (Ծնն. 2:9, 3:6): Ուտելով այն՝ մարդկությունը ձեռք է բերում գիտելիք և խորաթափանցություն, բարու և չարի հարցերում իշխանություն:

Բարու և չարի իմացությունը ենթադրում է նաև իշխանություն գործադրել և դատողություն բանեցնել: Դա այն է, ինչ Աստված անում է արարչագործության ողջ ընթացքում: ➔ էջ 8

ԴԱՍԸ ՀՈԳԵՎՈՐԱԿԱՆՑ: ՊԱՏՄՈՒԹՅՈՒՆ ԵՎ ԱՐԴԻԱԿԱՆՈՒԹՅՈՒՆ



Հայոց կաթողիկոսի՝ Գրիգոր Քարավեժի կարճատև աթոռակալումը և մահը

Երիտասարդ հոգևորական Գրիգոր Ե Քարավեժը հաջորդել է Գրիգոր Դ Տղային (1193–1194): Նա Գրիգոր Դ Տղայի ազգականն էր՝ Պաիվաժունի Ապիրատյանների նշանավոր տոհմից: Մ. Օրմանյանը, խոսելով Գրիգոր Դ Տղայի մահվանից հետո ստեղծված վիճակի մասին, նշում է, որ այդ ժամանակ Ամենայն Հայոց Կաթողիկոսական Աթոռի հավանական թեկնածուներից էին Գրիգոր Ապիրատ և Ներսես Լամբրոնացի եպիսկոպոսները, որոնք բավական ազդեցիկ հոգևորականներ էին Կիլիկյան Հայաստանում: Բայց այդ երկու թեկնածուներից և ոչ մեկն էլ չառաջադրվեց, քանի որ Լևոն Մեծագործը և հայ բարձրաստիճան հոգևորականության մեծ մասը կաթողիկոսի ընտրության հարցում այլ որոշում կայացրին:

Այսպես՝ Գրիգոր Դ Տղա Կաթողիկոսի մահվանից հետո Լևոն Բ իշխանապետը և հայ իշխանական վերնախավը պաշտպանեցին երիտասարդ հոգևորական Գրիգոր Ե Քարավեժի թեկնածությունը, որն ընդամենը 22 տարեկան էր: Լևոն Բ-ի աջակցությունը Գրիգոր Քարավեժին նպատակ ուներ սիրաշահելու բուն Հայաստանի հոգևորականությանը: Բանն այն է, որ բուն Հայաստանի հոգևոր ներկայացուցիչներն էին առաջ քաշել նրա թեկնածությունը՝ մերժելով կամ կանխելով հատկապես Գրիգոր Ապիրատի ու Ներսես Լամբրոնացու կաթողիկոսական հավակնությունները, քանի որ նրանց դիտում էին որպես լատինամետ գործիչների: Իհարկե, վերը նշված ժամանակաշրջանում Կիլիկիայում կային արժանի հավակնորդ մի շարք այլ հոգևորականներ ևս, սակայն բուն Հայաստանի նկատմամբ վերաբերմունքը կարելի է բացատրել այն պարզ հանգամանքով, որ հայոց իշխանապետը երազում էր հայկական բոլոր հողերն ազատագրել օտարերկրյա տիրապետությունից և դրանք միավորել իր իշխանության ներքո: Նա ցանկանում էր մի այնպիսի անձի տեսնել կաթողիկոսական աթոռին, որն ընդունակ կլիներ աջակցելու իրեն: Արժե նաև նշել, որ «Թուրք առ Լևոն արքայն հայոց» աշխատության մեջ Ներսես Լամբրոնացին ոչ միայն դեմ է եղել Գրիգոր Ե Քարավեժի ընտրությանը, այլև շատերին է համոզել, որ այդ «մանուկը» կաթողիկոս չընտրվի: Չնայած Լևոն Մեծագործը մի քանի անգամ հրավիրել է Ներսես Լամբրոնացուն և համոզել, որ վերջինս գա և մասնակցի Գրիգոր Ե Քարավեժին կաթողիկոս օծելու ծիսակատարությանը, բայց նա հրաժարվել է: Մի քանի անգամ կանչելուց և ստիպելուց հետո միայն Ներսես Լամբրոնացին ականաջից համաձայնել է և հակառակ իր կամքի՝ կատարել Լևոն Մեծագործի պահանջը:

Սկզբում արքայի և կաթողիկոսի հարաբերությունները բավականին ջերմ էին, սակայն շուտով բարդանում են: Հիշատակման է արժանի Գրիգոր Ե Քարավեժի հետ տեղի ունեցած դեպքը: Ինչպես գիտենք, սկզբում Լևոն Մեծագործը պաշտպանեց նրա թեկնածությունը, բայց երբ կաթողիկոսն արտահայտում է հայ հոգևորականության մեծամասնության կամքը և հավանություն չի տալիս Լևոնի Բ-ի քաղաքական որոշ դիրքորոշումներին, վիճակն արմատապես փոխվում է: Այստեղ հարց է առաջ գալիս, թե արդյոք Հայոց Կաթողիկոսն ունե՞ր լծակ՝ հակազդելու հայոց իշխանապետի վրա: Հավանաբար ունեն: Ենթադրելի է, որ հայրապետական գահին էր բազմել Լևոն Մեծագործի աջակցությամբ, սակայն Հռոմկլայի Հայոց Կաթողիկոսարանն այս պատմաշրջանում հայ ժողովրդին միավորող միակ իրավական իշխանությունն էր պետականությունը կորցրած ժողովրդի համար: Եվ Հայոց Կաթողիկոսարանը վեր էր Կիլիկիայում և այլուր իշխանության հասած հայկական բոլոր իշխանական տներից: Բացի այդ՝ Հռոմկլայի Կաթողիկոսը գերակա էր հայկական բոլոր իշխանությունների նկատմամբ:

Պատմիչ Սմբատ Սպարապետը հետևյալն է հայտնում Հայոց Կաթողիկոսի մասին. «Տղայ կաթողիկոսն Տեր Գրիգորիս չհնազանդէր ամենեցուն, այլ ինքնիշխանութեամբ ունէր զհայրապետութիւն...»: Ամենայն հավանա-



կանությամբ կաթողիկոս ընտրվելուց հետո Գրիգոր Ե Քարավեժը հասկանում է, որ ապագայում հնարավոր է Հայոց Եկեղեցուն դավանաբանական լուրջ զիջումներ պարտադրվեն, ուստի առանձին կարևոր հարցերում սկսում է առարկել հայոց մեծ իշխանապետին, չինազանդվել, ինքնուրույնություն ցուցաբերել, որը, անշուշտ, չէր կարող անհետևանք մնալ: Շատ կարևոր է նաև նշել, որ հատկապես այս շրջանից սկսած՝ Կիլիկիայի հայ իշխանական վերնախավը փորձում է իրեն ենթարկել Հայոց Կաթողիկոսներին՝ պահանջելով նրանց գործուն աջակցությունը հայկական պետության արտաքին քաղաքական հարցերում:

Խնդիրն այն է, որ 12-րդ դարի 90-ական թվականներին Լևոն Մեծագործը փորձում էր որոշակի զիջումների գնով միջազգային ճանաչում ձեռք բերել և ճանաչվել արքա եվրոպական միապետերի կողմից, իսկ Հայոց Կաթողիկոսը հավանաբար ցանկանում էր պաշտպանել Հայ Առաքելական Եկեղեցուն ինքնուրույնությունը: Այս փուլում Եկեղեցու և պետության հարաբերությունները խիստ սրվում են:

Փաստորեն՝ Հայոց Կաթողիկոսը փորձում է պահպանել Հայ Եկեղեցու անկախությունը և ավանդական դիմագիծը: Իհարկե, դա շատ օրինական է և ճիշտ, սակայն նրա կախարհային քաղաքականությունը հանդիպում է Լևոն Բ իշխանապետի և ամենայն հավանականությամբ մի շարք այլ իշխանների դժգոհությանը, քանի որ Կիլիկյան Հայաստանում գրեթե միշտ գործել էին արևմտամետ դիրքորոշում ունեցողները: Բացի այդ՝ 12–14-րդ դարերում Կիլիկյան Հայաստանի կախվածությունը Արևմուտքից պայմանավորված էր նաև այն հանգամանքով, որ շատ իշխաններ և հետագայում նաև երկրի արքաները Արևմուտքի հետ կապվում էին խնամհական կապերով, իսկ մի մասն էլ՝ տնտեսական համագործակցությամբ ու սեփական շահերով:

Այս շրջանում Լևոնը Կիլիկիայի թագավորությունը ճանաչելու նպատակով շատ եռանդուն բանակցություններ էր սկսել և՛ Բյուզանդական կայսրության, և՛ Հռոմի պապական աթոռի ներկայացուցիչների հետ: Քանի որ Հայոց Կաթողիկոսը դեմ էր որևէ դավանական զիջման, հայոց իշխանապետը որոշում է ազատվել կաթողիկոսից և հրամայում է եկեղեցական ժողով հրավիրել, որը սակայն տեղի չունեցավ: Արևելյան վարդապետներն անշուշտ պաշտպանելու էին Հայրապետին և վիճեցնելու Լևոն Մեծագործի ծրագրերը: Շուտով Գրիգոր Ե Քարավեժն ամբաստանվում է իր հակառակորդների կողմից:

Լևոն Մեծագործը Սսի Հովհաննես եպիսկոպոսին ուղարկում է Հռոմկլա և ձեռքալալել տալիս կաթողիկոսին՝ մեկուսացնելով Կոպի տառնում: Չնայած կաթողիկոսական բերդի զինվորները զենք են վերցնում՝ իրենց տիրոջը պաշտպանելու, սակայն Հովհաննեսի կողմնակիցներն ավելի զորեղ են գտնվում: Հարց է առաջանում՝ արդյոք Լևոնը՝ որպես Կիլիկյան պետության ղեկավար, իրավասուն էր Հայոց Կաթողիկոսին ձեռքալալելու, երբ Հռոմկլայի Կաթողիկոսարանը դեռևս չէր մտնում Կիլիկիայի իշխանության սահմանների մեջ: Ենթադրելի է, որ Գրիգոր Ե Քարավեժը հայոց իշխանապետի օգնությամբ էր դարձել Ամենայն Հայոց Կաթողիկոս, սակայն ներկայացնում էր ողջ հայությանը: Եվ նման պայմաններում Ամենայն Հայոց Կաթողիկոսը կարող էր դիմել Եգիպտոսի սուլթանին,

քանի որ Հռոմկլայի Հայոց Կաթողիկոսարանը գտնվում էր նրա իշխանության տարածքում: Կաթողիկոսը չի ցանկացել, որ Կիլիկիայի հայկական իշխանության և Եգիպտոսի սուլթանության հարաբերությունները բարդանան:

Փաստորեն՝ կաթողիկոսը չի համաձայնել հետևել Լևոն Մեծագործի և նրա համախոհների զիջողական քաղաքականությանը, անգամ հանձն չի առել կաթողիկոսական կնիքով և ստորագրությամբ վավերացնել Հռոմեական Եկեղեցուն հաղորդվելիք զիջողական հայտարարությունները: Սա այն եզակի դեպքից էր, երբ Հայոց Կաթողիկոսին բանտ էին նստեցնում առանց քննության ու եկեղեցական ժողովի:

Շուտով Լևոն Մեծագործը թուրք է գրում Հայաստանի հոգևորականներին՝ նրանց կարծիքն իմանալու ակնկալիքով, սակայն մինչ պատասխան ստանալը Հայոց Կաթողիկոսին գտնում են բերդի պարիսպների մոտ՝ անշնչացած ընկած, մեջքին՝ պարան (այդ տեղից էլ Քարավեժ՝ ժայռից ցած գլորված կամ գահընկեց արված):

Ինչ էր իրականում տեղի ունեցել, ինչպիսի պայմաններում սպանվեց Հայոց Կաթողիկոսը:

Շատ հավանական է, որ Լևոն Մեծագործը չի ցանկացել բարդացնել հարաբերությունները կաթոլիկ տիրակալների հետ, որոնք իրեն թագ էին խոստացել: Բացի այդ՝ հնարավոր է, որ որոշ քաղաքական և հոգևոր անձինք ամբաստանում էին Հայոց Կաթողիկոսին Լևոն իշխանապետի մոտ: Չի բացառվում նաև, որ հայոց իշխանապետը դիտավորյալ է օգնել երիտասարդ հոգևորականին՝ բազմելու հայոց հայրապետական գահին՝ հույս ունենալով՝ հետագայում նրան ամբողջությամբ իր վերահսկողության տակ պահելու, բայց կարճ ժամանակ անց հայոց իշխանապետը համոզվեց, որ իր այդ հաշվարկը սխալ է դուրս եկել:

Ինչ հանգամանքներում տեղի ունեցավ Գրիգոր Ե Կաթողիկոսի մահը: Հայ պատմիչներն այնպես են ներկայացնում դեպքը, որ իբր Հայոց Կաթողիկոսը պարան է պատրաստել, որպեսզի զիջեր պատուհանից իջնի և փորձի փախչել, բայց պարանը կտրվել է, և նա ընկել է ու մահացել: Հավանաբար միջնադարյան հայ պատմիչները, իրենց երկերում նշյալ խնդրին անդրադառնալով և նման գնահատական տալով, փորձել են մեղմել իրավիճակը և ցույց տալ, թե հայոց իշխանապետը մեղավոր չէր կատարված դեպքի համար, և կաթողիկոսի մահվան պատճառն այլ է: Ըստ հայ պատմիչների՝ Հայոց Հայրապետին համոզելով, թե իբր ուզում են փախցնել, զիջերով իջեցրին բերդապարսպից, բայց քանի որ Գրիգոր Ե Քարավեժը հաղթանակում ու մեծամարմին երիտասարդ էր, պարանը, որով վերջինիս իջեցնում էին, կտրվեց, զուցե և, ինչպես ասում են, կտրեցին, և նա, ընկնելով բարձրությունից, մահացավ: Բայց, ամեն դեպքում, եթե Հայոց Կաթողիկոսի դեմ դավադրություն չկազմակերպվեց, ապա նրան ոչ կձեռքալալեն, ոչ էլ բանտ կնստեցնեին:

Իհարկե, շատ դժվար է հստակ գնահատական տալ: Ենթադրելի է, որ կողմից Հայոց Կաթողիկոսի սպանությունը կարող էր կազմակերպված լինել Լևոն Մեծագործի կողմից՝ իր դեմ արտահայտվելու համար, սակայն կարող է այլ տարբերակ ևս լինել, քանի որ եթե իրականում Լևոն Բ իշխանապետը ցանկանար վերացնել Գրիգոր Ե Քարավեժին, ապա նա ինչո՞ւ պետք է հրապարակային ձևով փորձեր ժողով հրավիրել, դիմում հղեր արևելյան վարդապետներին, ձեռքալալել տալ և ամբողջ ուշադրությունն իր վրա սևեռեր: Ցանկության դեպքում հայոց իշխանապետն առանց աղմուկի կկարողանար հենց Հռոմկլայի բերդաքաղաքում կազմակերպել վերջինիս սպանությունը, և ոչ ոք նրան չէր կասկածի: Շատ հավանական կարող է լինել այն տեսակետը, որ այդ սպանությունը կազմակերպված և իրականացված լինել մի խումբ լատինամետների կողմից, որոնք փորձել էին օգտվել Լևոն Մեծագործի և Գրիգոր Ե Քարավեժի միջև ծագած վեճից:

Արամ ՀՈՎՀԱՆՆԻՍՅԱՆ, պ. գ. թ.

ՅՈՒԹ ԽՈՐՀՈՒՐԴՆԵՐ

(ակրոստիքոսներ)

ՄԿՐՏՈՒԹՅՈՒՆ

Մկրտությունն իմ օրինիր, Տեր Աստված, Կորստյան մատնող մեղքից ազատիր, Բաբուճապետիր ուսմունքով վսեմ, Տնոր ինձ Սուրբ Հոգովդ վերստին ծնվել, Ու թող որ մեռնի իմ մարդը իմ մեջ: Թողություն շնորհիր բազում մեղքերիս, Յուրով սուրբ օծիր մարմինս տկար, Ու թող Քրիստոսի սուրբ ողորմությամբ Նորոգված ծնվեմ ջրից ու հոգուց:

ԴՐՈՇՄ

Դրոշմը Սուրբ Հոգու դիր սրտիս վրա, որ մույն

Բոպեին ճշմարիտ Հոգին իմ մեջ հաստատվի,

Ուղեբու օծիր մյուռնոնովդ սուրբ, որ Շնորհներովդ պակակազարդված քայլեմ անասան՝

Մերձենալով Սուրբ Էությանդ հետ:

ԱՊԱՇԽԱՐՈՒԹՅՈՒՆ

Ապաշխարության աղոթքի ժամին Պաղատում եմ Քեզ, Աստված երկնային, Ամբան ծառայիս մի արհամարհիր, Շնորհներիցդ մի գրկիր անհույս տարակուսածիս,

Խիզախություն տուր գիտակցելու մեղքերս անթիվ:

Աստվածային Քո ողորմությամբ

Բոպե դարձրու տանջանքներս անվերջ, Ուղեցույց եղիր հավիտենական կյանքի ընթացքին,

Թույլ տուր անիրավ օրինազանցիս Յուրաքանչյուր պահ լինել Քո կողքին:

Ու թող աղերսն իմ ապաշխարության Նանիր մեղքերից ինձ ազատի հար:

ՀԱՂՈՐԴՈՒԹՅՈՒՆ

Հիմնա Քրիստոս, Որդի Աստուծո, Ամահություն, հարություն և կյանք,

Ղազարոսին ինչպես կենդանացիր

Ողորմությամբ Քո աստվածային,

Բաբուճաբար ինձ էլ շնորհիր

Դալով մահվանից քայլել դեպի կյանք:

Ու հաղորդության խորհուրդը Քո սուրբ

Թող ինձ հիշեցնի մշտնջենապես Յուրայիններիդ հետ ընթրիքը Ձատկի, երբ Ուխտ սահմանեցիր մարմինդ զոհել,

Նոր Ուխտի Արյամբ աշխարհը փրկել:

ՊՍԱԿ

Պարգևիր, Տեր իմ, ինձ երջանկություն Սուրբ Հոգուց բխող շնորհներով Քո,

Ամուսնությունն իմ թող օրինյալ լինի Կենարար խաչիդ հովանու ներքո:

ՁԵՆԱԴՐՈՒԹՅՈՒՆ

Ձեռքդ ամենազոր ու անպարտելի Եկեղեցու վրա դիր, Քրիստոս,

Ռազմիկներից հոգևորական Նեմզ թշնամու ահից պաշտպանիր,

Աբելաներիդ շնորհազարդիր՝

Դարմանելու փառահեղ շնորհով:

Բաբուճապետիր հոտդ երկրային, Ուղորդիր նրան անխախտ ընթացքի:

Թող քահանաներիդ սուրբ մկրտությամբ Յուրաքանչյուր հայ քրիստոնյա դառնա,

Ուխտակից լինի սուրբ խորհուրդներիդ՝ Նախասահմանված Արարչիդ կողմից:

ՎԵՐՋԻՆ ՕԾՈՒՄ

Վշտերից տանջված տեռատես կնոջը Երկարատև հիվանդությունից

Բոպե՛ս անկա՛ն ապաքինեցիր,

Ջերմը սաստեցիր Պետրոսի զոքանջի, Ի ծնե կույրին շնորհեցիր տեսություն,

Նվաղ ու թշվառ անդամալույծին ոտքի հանեցիր:

Օծիր սուրբ յուրովդ նաև

Ծառայիդ հիվանդ ու հյուծված,

Ուղղիր դեպի կյանք հավիտենական՝ Մեղքերից զազիր խապառ արձակված:

ՅՈԹ ՄԱՀԱՅՈՒ ՄԵՂՔԵՐ

ՀՊԱՐՏՈՒԹՅՈՒՆ

Հպարտությունը սնապարծական Պարուրել է մեղսավոր հոգիս, Արիամարիանքն ու գոռոզությունը Րոպե առ լոպե ավելանում են Տգետ, մեծամիտ Ու ինքնահավան անձիս խորանում: Թողություն շնորհիր, Տեր ամենագութ, Յոթ մեղքերից ամենասաստիկ և Ուժգնալի ախտից ազատիր Նենգ ու եսամոլ ամբարտավանիս:

ՆԱԽԱՆՁ

Նախանձով լցված սիրտս չարական Ապականվել է նենգ խորհուրդներով, Խավարն է պատել հոգիս մեղավոր: Ազատիր, Տեր իմ, այս զազիր մեղքից, Նորից պարզևիր Սեր աստվածային Ձառ ու անկամորդ չարահավանիս:

ԲԱՐԿՈՒԹՅՈՒՆ

Բարկությամբ լցված սիրտս չարանենգ Ամենաչնչին առիթից անգամ Րոպեաբար պոռթկում է ցասկոտ, Կորցնում իսպառ ինքնազսպումն Ու կորստյան մատնում ախտավոր հոգիս: Թողություն շնորհիր, Տեր ամենագութ, Յոթ մեղքերից ամենաստոր Ու պարսավելի ախտից ազատիր Նենգախոհ, ջղային մոլեգնահարիս:

ԱԳԱՐՈՒԹՅՈՒՆ

Ագահությունն ընչասիրական Գերել է անձիս էությունն արար, Անհագուրդ միտքս կենտրոնացել է Հղիպսեր, շվայտ ցանկությունների Ու եսակենտրոն ապրուստի վրա: Թողություն շնորհիր, Տեր ամենազոր, Յոթ մեղքերից ամենազազիր Ու անպատվելի ախտից ազատիր Նսեմ ու ժլատ արծաթապաշտիս:

ԾՈՒԼՈՒԹՅՈՒՆ

Ծուկությունը՝ աշխատանքատյաց, Ունայնատենչ և ծանծրոյթառատ, Լցրել է հոգիս հուսահատությամբ, Ուժագուրկ դարձրել մարմինս տկար: Թողություն շնորհիր, Տեր ամենագութ, Յոթ մեղքերից ամենանշավակելի Ու շնորհագերծ ախտից ազատիր Նվաղ ու անզոր դատարկակյացիս:

ՈՐԿՐԱՍՈՒԹՅՈՒՆ

Որկրամոլությունը երկրասիրական Րոպե առ լոպե բազմապատկվում է Կրքոտ ու անկուշտ մարմնիս անոթում: Րախճանքները՝ առօրեական, Արատաբեր ու մարմնակործան, Մեղսավոր անձս դարձրել են գերի: Որովայնապաշտ անձս ապական Լցվել է իր ողջ էությամբ Ուտել-խմելու անհագ փափագով միայն: Թողություն շնորհիր, Տեր պարզևատու, Յոթ մեղքերից ամենամարդ Ու նախատելի ախտից ազատիր Նանրասեր, ագահ մեղանշականիս:

ԲԱՋԱԽՈՐՈՒԹՅՈՒՆ

Բղջախոհությունը ցանկասիրական, Ղեկավարելով միտքս սասանվող, Ջանասիրաբար համակել է Ախտավոր անձիս էությունը ողջ: Խայտառակ, պազշոտ պատկերներն անթիվ Ողողել են մտքիս հորիզոնն աղտոտ, Հեշտասիրությամբ լցրել մարմինս Ու ապականել հոգիս վավաշոտ: Թողություն շնորհիր, Տեր ամենագութ, Յոթ մեղքերից ամենապիղծ Ու մարմնակործան ախտից ազատիր Նանիր, հեշտամոլ ամոթահարիս:

Աճի ՆԱԶԱՐՅԱՆ

Սուրբ Անդրե գորավարի և նրա բանակի, Կալինիկոս և Դոմետիոս վկաների հիշատակությունը

← էջ 2, 3

Սրբի խոսքերից զորացած՝ ամբողջ բա-նակը միաբան դուրս եկավ Քրիստոսի ան-վան համար մարտիրոսություն ընդունելու և երկնքի արքայության փառքի պատմուճան-ներով զգեստավորվելու: Նահատակությունից առաջ իրենց հայացքները երկինք ուղղեցին ու վերջին աղոթքը վերառաքեցին, և բոլորը սրի քաշվեցին՝ այլևս անդամագրվելով Տի-րոջ հաղթանակած բանակին: Իսկ հեղված արյան վայրում բժշկության մի աղբյուր բխեց՝ հիվանդների ախտերը ամոքելու համար: Պետրոս և Նունոս եպիսկոպոսները, գալով այս վայրը, գտան թե՛ կենդանի աղբյուրը, թե՛ վկաների սուրբ մասունքները, որոնք ծածուկ ամփոփեցին հանգստյան վայրում:

Հալածանքների այս մույն շրջանում է ապ-րել Սուրբ Կալինիկոս վկան, որը մույմպես ծագունով Կիլիկիայից էր: Նա մանկուց դաս-տիարակվել էր քրիստոնեական ոգով՝ ար-դարության քաղցն ու ծարավը իր հոգում: Սակայն ժամանակի զարհուրելի հալածանք-ների պատճառով նա բացահայտ չէր խոսում իր քրիստոնյա լինելու մասին: Ապրելով Գա-ղատիայում՝ զբաղվում էր ձեթի վաճառքով, ինչից ստացած շահույթն օգտագործում էր քրիստոնյա քույրերին ու եղբայրներին օգ-նելու համար, իսկ եկեղեցիներին ձրիաբար ձեթ էր տրամադրում: Վաճառականի մասնա-գիտությամբ բնորոշ՝ նա ամեն տեղ ելումուտ ուներ և ամեն առիթ օգտագործում էր Քրիս-տոսի խոսքի քարոզչության համար՝ առանց վախի և ամոթի, ինչպես Պողոս առաքյալն է ասում. «Ես ամոթ չեմ համարում Ավետարա-նը, որովհետև այն Աստծու գործությունն է՝ բո-լոր նրանց փրկության համար, ովքեր հավա-տում են» (Հռոմ. 1:16):

Աստծո փրկարար խոսքը Կալինիկոսի միջոցով շատերին փոխանցվեց, և շատե-րը դարձի եկան: Իմանալով այդ մասին՝ Անկյուրիայի հեթանոս վաճառականները մատնեցին երանելուն քաղաքի վերակա-ցու Սակերդոնի ձեռքը, որն աչքի էր ընկել քրիստոնյաների հանդեպ իրականացրած դաժան հալածանքներով: Նրա հրամանով երիտասարդ Կալինիկոսին ձերբակալում են և ատյանի առաջ կանգնեցնում: Սկզբում կուսակալը ցանկանում է մեղմ խոսքերով սիրաշահել Կալինիկոսին, որ նա ուրանա Քրիստոսին և զոհ մատուցի հեթանոս կուռ-քերին, սակայն նա աներեր է մնում իր հա-վատի մեջ, ինչից զայրանալով՝ Քրիստոսի հալածիչը հրամայում է մահակներով ծեծել և երկաթներով քերել նրա կողերը, ինչը նա-հատակի համար տանջանք չէր, այլ՝ երա-նություն: Կալինիկոսի համարձակ և հաս-տատուն պատասխանները բորբոքում են անհաշտ կուսակալի բարկությունը, որը հրամայում է երկաթ բևեռներ գամել նրա ներքաններին, ապա Անկյուրիա քաղաքի միջով քայլեցնել նրան հեծյալ զորքի առ-ջևից ու տանել Գաղատիային սահմանակից Պափլագոնիա նահանգի Գանգրես քաղաքը և այնտեղ իրկիզել՝ ի տես բոլոր քրիստոնյա-ների, որ ահաբեկեն նրանց:

Գողգոթայի պես ձգվող այդ ճանապար-հին սուրբը տանջանքների անասելի ցա-վը կրում էր սիրով և ուրախությամբ: Ծա-նապարհը դժվարին էր, իսկ զինվորները, որոնք ուղեկցում էին դատապարտյալին, ծարավից թուլանում և ուժասպառ էին լի-նում: Նրանք դիմում են սրբին՝ ասելով. «Եթե ճշմարիտ են քո ասած խոսքերը, ապա ջուր բխեցրու այս անապատ վայրում՝ խնդրելով քո Աստծուն, Ով, ինչպես ասում ես, Արա-րիչն է բոլոր արարածների»: Այնժամ սուրբն աներկբա հավատքով և Աստծուն ապա-վինելով ծնրադրում, լուռ աղոթում է, և այդ անջրդի հողում՝ Մատրիկե կոչվող տեղում, ապառաժից սառը և քաղցրահամ ջուր է բխում: Հիմնվորները խմում ու զովանում են, գոհանում Աստծուց, և նրանցից ոմանք հա-վատում են Աստծուն: Մահապատժի վայր հասնելով՝ շնորհապարտ զինվորներն ակ-նածում էին և չէին ցանկանում մասնակիցը դառնալ սրբի նահատակությանը, իսկ երա-նելին հորդորում էր նրանց կատարել կու-սակալի հրամանը: Վախենալով բռնավորից և լսելով սրբի խոսքերը՝ նրանք խարոյկ են վառում Գանգրեսի հրապարակում և իրկի-

զում Քրիստոսի մեծ վկային՝ գերերջանիկ Կալինիկոսին: Բարեպաշտ մի կին վերց-նում է նրա մշխարներն ու պահում, մինչև որ դադարեն հալածանքները: Ապա մի վկա-յարան է շինում Գանգրես քաղաքում, որտեղ ամփոփում է մշխարները, ուր շատ բժշկու-թյուններ էին լինում՝ ի փառս Աստծո:

Դիոկղետիանոս կայսեր կողմից իրակա-նացրած քրիստոնեական մեծ հալածանքին զոհ գնաց նաև Դոմետիոս վկան: Նա ծա-գունով Կիլիկիայի մշանավոր Տարսոն քա-ղաքից էր՝ ազնվական ընտանիքի ժառանգ: Բարեպաշտ և աստվածասեր երիտասարդը հմուտ բժիշկ էր՝ տիրապետելով բժշկության բոլոր՝ թե՛ Ասկլեպիոսի, թե՛ Հիպոկրատի և թե՛ Գաղիանոս Մեծի հմտություններին: Բացի այդ, լինելով Աստծո ընտրյալ անոթ, Տիրոջ կողմից բժշկության շնորհ էր ստացել, ինչ-պես նախկինում առաքյալները և մարգա-րեները: Շրջում էր ամենուր և ձրիաբար բժշկում մարդկանց ոչ միայն մարմնապես, այլև հոգեպես, Քրիստոսի օրինակով, Որ մարդկանց բժշկում էր մարմնով, հոգով և մտքով: Նա բոլորին ուսուցանում էր ան-սասան մնալ ճշմարիտ հավատի մեջ, խոր-շել կուռքերից, չվախենալ հալածանքներից, որոնք միայն այս ժամանակավոր կյանքը կարող են մեզանից խլել՝ փոխարենը Քրիս-տոսի հավիտենական և անամց ժառանգու-թյան խոստումը տալով: Նման քարոզչությու-նը չափազանց մխիթարող և քաջալերող էր, հատկապես հալածանքներով լի այդ օրե-րին, երբ քրիստոնյաները երկմտանքի և վա-խի մեջ էին:

Քրիստոսի անվան համար մեծ զրկանքնե-րի և նեղությունների մատնված եղբայրներին հուսադրելու համար Դոմետիոսը թողեց Տար-սոնը և մեկնեց Բյուբանիա՝ հաստատվելով կայսերական Նիկիա քաղաքում: Այստեղ էլ նա, իր նախկին համոզումնի համաձայն, շրջում էր հրապարակներում, բժշկում հո-գածությունից զուրկ և անտեսված մարդկանց՝ փոխանցելով նաև ճշմարիտ և Կենդանարար հավատի լույսը: Հալածանքների պատճառով բազմաթիվ քրիստոնյաներ, խոստովանողներ և վկաներ հայտնվել էին բանտերում, և նա, բանտապետերի գրպանները լցնելով, հա-մարձակ այցելում էր նրանց և բժշկում վեր-քերն ու խոցերը: Քաջասիրտ և Քրիստոսի համար իրենց անըն ուրացած հավատացյալ-ներին զովերգում էր, իսկ տկարներին իր խոս-քերով բաջալերում ու ամրացնում՝ մշտապես հիշեցնելով Քրիստոսի այն խոսքը թե. «Մի՛ վա-խեցեք նրանցից, որ մարմինն են սպանում, բայց հոգին սպանել չեն կարողանում: Այլ դուք հատկապես վախեցե՛ք նրանից, ով կարող է թե՛ հոգին և թե՛ մարմինը կորստյան մատնել գեհեմի մեջ» (Մատթ. 10:28): Այս և նման շատ այլ խոսքերով ու Սուրբ Հոգով բոցավառում էր նրանց՝ Քրիստոսին խաչակից լինելու և Նրա փառքին հաղորդ դառնալու:

Սակայն հեթանոսներից ոմանք, տեսնելով նրա համարձակ քարոզչությունը, լուր տվե-ցին Մաքսիմիանոս կայսրին, թե Դոմետիոս անունով մեկը մարդկանց բժշկելու պատր-վակով եկել է Նիկիա, սակայն բոլորին մո-լորության մեջ է գցում՝ հեռացնելով նրանց հեթանոս աստվածների պաշտամունքից: Կայսրը, որ մինչ այդ լսել էր մեծահամբավ բժշկի մասին, հրամայեց նրան շղթայակապ իր մոտ բերել: Երբ երանելի Դոմետիոսը, իր սովորության համաձայն, հրապարակում քա-րոզում էր և բժշկում մարդկանց, դահիճները գալիս ու շղթաներ են դնում նրա ձեռքերին ու պարանոցին և տանում Նիկոմեդիա: Ծա-նապարհին սուրբը մտածում էր թե՛ այնտեղ թողած իր եղբայրների, թե՛ իրեն սպասող վախճանի մասին, քանզի կասկածում էր, որ կայսրը կխնայի իրեն և խաբեությամբ կիրա-ժարեցնի իր հավատից:

Երբ փոքր-ինչ հեռացել էին քաղաքից, Դոմետիոս վկան խնդրում է իջեցնել իրեն գրաստից՝ Աստծուն աղոթելու համար: Նրա հանդեպ ակնածանքն այնքան մեծ էր, որ ան-կարող եղան մերժել խնդրանքը: Երանելին մի փոքր հեռացավ, ծնրադրեց և աղոթք ուղ-ղեց առ բարձրյալ Աստված: Երբ Ս.Դոմետիո-սը ավարտեց աղոթքը, բարձրաձայն գոչեց՝ ամեն, և հոգին ավանդեց ի Քրիստոս:

Նկատելով սրբի երկարատև բացակայու-

թյունը՝ զինվորները գնացին նրա հետևից և մահացած գտան: Խուճապահար զինվոր-ները որոշեցին կտրել նրա գլուխը և տանել կայսրին, ինչի պատճառով կուրացան: Լսե-լով սրբի մահվան և կուրացած զինվորների մասին՝ կայսրը խիստ տրտմեց ոչ այնքան իր զինվորների, որքան սուրբ նահատակի համար: Այնժամ կայսրը հրամայեց գտնել գլխատված մարմինը և միասին դնել շիրիմի մեջ: Երբ զինվորները կատարեցին հրամա-նը, նրանց տեսողությունը վերականգնվեց, բայց ոչ միայն մարմնի, այլև հոգու, քանզի հավատացին Քրիստոսին և Նրա կենարար խոսքին: Հետագայում՝ հաղթական պատե-րազմներից և ամբարիշտ կայսրերին հեռաց-նելուց ու քրիստոնեական կրոնի հռչակումից հետո, քրիստոսապալս Կոստանդիանոս կայ-սեր հրամանով Ս. Դոմետիոսի անունով երեք վկայարան կառուցվեց, որտեղ ամփոփվեցին սրբի մասունքները:

Սրբերի և մարտիրոսների դերն անուրա-նալի է քրիստոնեական եկեղեցու ձևավոր-ման և զարգացման գործում, քանզի նրանք եղան Քրիստոսի կողմից կառուցվող եկեղե-ցու շինարարները: Նրանք քրիստոնյայի գե-րազանցության օրինակներ դարձան՝ փոր-ձելով գնալ Քրիստոսի խաչի ճանապարհով՝ գերծ աշխարհային մտածումներից և հոգ-սերից, ապրելով այս կյանքը երկնքի արքա-յության սպասումով, այլ ոչ անցավոր կյան-քի նվաճումներով: Ամենքս էլ այս կյանքում հնարավորություն ունենք գտնելու «գեղեցիկ մարգարիտը», սակայն, ի տարբերություն սրբերի, ոչ բոլորս ենք պատրաստ վաճառելու մեր ունեցվածքը՝ այն գնելու համար: Կենդա-նի հաղորդակցության մեջ լինելով Աստծո հետ՝ սրբերը մեզ փոխանցեցին կյանքի տա-րաբնույթ փորձությունների հաղթահարման օրինակներ: Սրբերի կյանքը ղեկավարվում էր Հիսուս Քրիստոսով՝ «Ես եմ ճանապարհը, ճշմարտությունը և կյանքը» (Հովհ. 14:6), որի ուղենիշը ծառայության և օրինակի ճա-նապարհն է, կատարելության, ողորմության և սիրո ընթացքը: Նրանց կատարած հոգևոր խիզախումներն այսօր ոմանց համար ան-հասկանալի և անտրամաբանական կա-րող են թվալ, քանզի երկրային կյանքի խոր-հուրդները տարբեր են երկնքի արքայության խորհուրդներից, և «Ինչքան էլ որ մայե՛նք, չենք տեսնի, ինչքան էլ որ լսե՛նք, չենք հաս-կանա» (Մարկ. 4:12):

Անդրե գորավարը, Կալինիկոս և Դոմետիոս վկաները հաջողել էին այս կյանքում, սակայն նրանք չկուրացան անմիտ մեծահարուստի պես՝ միայն այս աշխարհի հոգսը հոգալով, այլ հետևելով Տիրոջ խոսքին, թե. «Ով կամե-նա իր կյանքը փրկել, այն կկորցնի, իսկ ով իր կյանքն ինձ համար կորցնի, այն կփրկի» (Ղուկ. 9:24), բարեբախտությունը առ չէինչ համարեցին՝ հանուն Տիրոջ արքայության: Չվախեցան, չամաչեցին, չերկմտեցին, այլ դեմ կանգնելով ահագնացող հալածանքնե-րին՝ տվեցին իրենց ունեցած ամենաթանկը՝ կյանքը: Էլ ինչպե՛ս պիտի արտահայտվի Աստ-ծո և ընկերոջ հանդեպ սերը՝ քրիստոնեու-թյան մեծագույն պատվիրանը:

Այսօր, բնականաբար, հանում Աստծո նա-հատակության առիթներ չկան, սակայն սիրո արտահայտման բազում առիթներ ունենք մեր կյանքում: Հարցն այն է, թե ինչից ենք մենք պատրաստ հրաժարվել հանուն քրիս-տոնեական սիրո՝ մեր անձնական ձգտումնե-րի՞ց, հարստությունի՞ց, ցանկասիրությունի՞ց....

Թեև այս աշխարհը կարող է հուսահատեց-նող և հիասթափեցնող լինել, սակայն քրիստո-նեությունն օգնում է մեզ նավարկելու աստ-վածային սիրո մեջ, քայլելու այս կյանքում Քրիստոսի հետ՝ Նրա բերած ճանապարհով: Իսկ սրբերը՝ իբրև հաղթանակած բանակի ան-դամներ, մեզ համար ոչ միայն օրինակներ են, այլև առ Աստված բարեխոսներ:

Հայ Առաքելական Սուրբ եկեղեցին Սուրբ Անդրեաս զորավարին և նրա բանակին, Սուրբ Կալինիկոսին և Դոմետիոս վկային հիշատակում է Վարագա Խաչին հաջորդող հինգերորդ երեքշաբթի կամ Սուրբ Խաչին հաջորդող տասներորդ երկուշաբթի օրը:

Արարատ ՂԱԶԱՐՅԱՆ
Տոնո սրկ. ՂԱԶԱՐՅԱՆ

Հիսուսի կրթությունն ու մասնագիտությունը

Հիսուս Քրիստոսի կյանքի և վարդապետության վերաբերյալ հետաքրքրասիրությունն ու բանավեճերը գրավում են աստվածաբանական, պատմական և սոցիալ-մշակութային ուսումնասիրությունների տարբեր շերտեր: Այս բազմազանությունից հաճախ առաջանում են հարցեր. ինչ կրթություն ու մասնագիտություն ուներ Հիսուսը, ինչ լեզուներ գիտեր:

Աստվածաշնչում բազմաթիվ վկայություններով հաստատվում է Հիսուսի կարդալու, գրելու և ուսուցանելու ունակությունը: Պատմական համատեքստում այդ վկայությունների ուսումնասիրությունից գիտնականները պարզել են, որ Հիսուսն էր ժամանակին լավ կրթված էր: Այս մասին նրանք փաստում են Ղուկասի Ավետարանից, ինչպես՝ Հիսուսը մագաղաթ է բացում՝ Նազարեթի ժողովարանում, կարդում է Եսայի մարգարեի գրքից և տալիս էր մեկնաբանությունը (Ղուկ. 4:16–21): Սա հուշում է Նրա հմտությունների մասին, քանի որ եբրայերեն կարդալու և առանձնապես Եսայի մարգարեի գիրքը մեկնաբանելու համար պետք էր օժտված լինել որոշ կարողություններով: Նման կարողություններ ձեռք էին բերվում սինագոգային դպրոցներում, որոնք հայտնի են որպես «Բեթ Սեֆեր»:

Հետաքրքիր է ինչ լեզուներով է խոսել և կարդացել Հիսուսը Քրիստոսը: Նա ապրում էր աշխարհագրորեն նշանակալի վայրում, որտեղ խաչվում էին տարբեր մշակույթներ, ինչը ենթադրել է տալիս, որ Հիսուս տիրապետում էր մի քանի լեզվի: Արամեերեն ամենահավանական լեզուն էր, որով Հիսուս խոսում էր էր առօրյա կյանքում: Ենթադրվել է, որ Նրա վարդապետությունները, ինչպես նաև աշակերտների և մարդկանց հետ շփումը հիմնականում արամեերեն էին: Պետք է հաշվի առնել նաև եբրայերենի դերը Հիսուսի կյանքում: Եբրայերենը երկրպագության և Սուրբ Գրքի լեզուն էր, և չնայած այն կարող էր ամենօրյա հաղորդակցության լեզու չլինել՝ սուրբ լեզու էր, որը գործածվում էր հիմնականում կրոնական համատեքստում: Ուսումնասիրությունները հնարավոր են համարում նաև Հիսուսի՝ հունարենի իմացությունը:

Հիսուսի կրթական ուղին, ամենայն հավանականությամբ, սկսվել է էր երկրային հոր՝ Դավթի համեստ բնակարանում: Հավանական է, որ Դավթի՝ որպես հյուան, երիտասարդ Հիսուսին է փոխանցել կյանքի կարևոր հմտություններ: Ատաղծագործության մեջ ներգրավված տարրական մաթեմատիկական անխուսափելիորեն պետք է լինեին Հիսուսի ուսուցման հիմքը: Վաղ տարիքում արդեն Հիսուսը նույնպես պետք է սովորեր կարդալ և գրել: Այդ ժամանակ հոր հիմնական պարտականություններից էր իր երեխաներին Սուրբ Գրքի մասին գիտելիքներ տալը:

Երբ քրիստոնյաներին հարցնում են, թե ինչ մասնագիտություն է ունեցել Հիսուսը, նրանք սովորաբար պատասխանում են՝ հյուան: Սա «տեկտոն» բառի թարգմանությունն է՝ կատարված կուբերի կողմից: Այնուամենայնիվ, «տեկտոնը» ավելի քիչ աղերսներ ուներ տանիքի վրա փայտյա տեղադրումների հետ: Տեկտոնի արհեստը տներ կառուցելն էր (քարից), այլ ոչ թե փայտամշակումը: Իսրայելում փայտի սակավության պատճառով տունը կառուցվել է հիմնականում քարից կամ փայտից ու կավից: Հետևա-



Կոզիմո Ռոսսելլի և Պիեռո դի Կոզիմո, «Լեռան քարոզ», 1481 թ.



12-ամյա Հիսուսը տաճարում, Հենրիխ Դոֆման, 1884 թ.

բար՝ «տեկտոն» բառը պետք է թարգմանվի որպես «շինարար» կամ «քաղաքացիական ճարտարագետ»: Գերմաներեն «ճարտարագետ» բառը կապված է դրա հետ: Ըստ ժամանակի մշակույթի՝ Հիսուսն այս արհեստը սովորել է էր երկրային հորից:

Հարգարժան հրեաները տարբերվում էին ոչ հմուտ բանվորներից նրանով, որ ունեին այնպիսի հատուկ կրթություն, ինչպիսին ուներ Հիսուսը: Հնարավոր է, որ էր արհեստի շնորհիվ նաև Նա կարողացավ հարաբերություններ հաստատել սոցիալական տարբեր դասերի հետ և այդպիսով ավելի լայն ճանաչում ձեռք բերել:

Տեկտոնի մասնագիտությունն այն ժամանակ հարգված էր: Պատմականորեն ապացուցված է, որ դարեր շարունակ Բեթղեհեմի շինարարները մեծ հարգանք են վայելել: Հիսուսի ծննդյան ժամանակ Հերովդես Անտիպաս թագավորը Նազարեթից ոչ հեռու Նոր քաղաք էր կառուցում, և ենթադրվում է, որ Դավթի մասնակցել է այս խոշոր նախագծին: Բայց սա միայն ենթադրություն է:

Ավետարաններում Հիսուսը բազմիցս հիշատակվում է որպես ռաբբի: Ըստ հրեական ավանդության՝ ռաբբի նշանակում է խիստ կրոնական պատրաստվածություն ունեցող ուսուցիչ կամ գիտնական: Այն փաստը, որ մարդիկ դիմել են Հիսուսին՝ որպես ռաբբի, հուշում է,

որ Նա հարգվել է նաև էր կրթական համար, տիրապետել է Սուրբ Գրքին և գիտեր, թե ինչպես սերմանել գիտելիքներն ուրիշների մեջ: Թալմուդում հիշատակություններ կան Հիսուս Նազովրեցու մասին այն պնդումներով, որ ժամանակակիցները Հիսուսին ռաբբի են ճանաչել: Գիտնականներից ոմանք, ինչպես Անդրեաս Կոստենբերգերը և Ռոբերտ վան Կուրստը, հիմնավորում են այս պնդումները՝ դրանով իսկ Հիսուսի ուսուցիչներին և դաստիարակներին վերագրելով Նրա՝ Սուրբ Գրքին տիրապետելը և ռաբբինիստական դասավանդման ոճը:

Հովհաննեսի Ավետարանում ևս կան վկայություններ, որ տալիս են Հիսուսի գրագիտության ապացույցներ: Սուրբ Գրքի վերաբերյալ Հիսուսի գիտելիքների խորությունն ընդգծում է, որ Նրա գրագիտությունը ամուր հիմնված է եղել եբրայերեն Աստվածաշնչի, Թորայի և հրեական պատմության վրա: Հենց սա էլ թույլ է տվել Նրան մարդկել էր ժամանակի կրոնական միջավայրում և մեկնաբանել Սուրբ Գրքը նոր ձևերով, առակներով, որոնք հիմք դարձան քրիստոնեության համար: Հիսուսը հրեա ռաբբի էր, և դա էլ ազդեց Նրա վարդապետությունների և գործողությունների վրա: Հրեական ավանդույթի մասին գիտելիքները, դասավանդելու ունակությունը և ռաբբիի հեղինակությունը ձևավորեցին Հիսուսի ուղերձները և գործողությունները:



Հիսուսը խոսում է էր տասներկու աշակերտների հետ, Ջեյմս Տիսո, 1850 թ.

Հիսուսի ամենակարևոր կրթությունը Գալիլեայի ժողովարաններում Նրա բազմաթիվ այցելությունների արդյունքում էր: Հիսուսի ժամանակներում կրթական համակարգը հասկանալի խոր հիմք է ստեղծում հենց Հիսուսի կրթությունը հասկանալու համար: Հիմ հրեական ավանդույթում կրթությունն առանցքային նշանակություն է ունեցել և պատվաստվել է վաղ մանկությունից՝ հիմնական ուշադրությունը դարձնելով կրոնական վարդապետություններին՝ ամենայն խստությամբ և նվիրվածությամբ: Հրեա տղաները շատ փոքր տարիքից հայտնվել են «Բեթ Սեֆեր» տարրական դպրոցում, որտեղ նրանք անգիր են արել Թորան: Այս հաստատությունում ռաբբին նրանց սովորեցնում էր կարդալ և գրել: Այս կրթությունը հիմնված էր այն բանի վրա, ինչն այժմ անվանում են երկխոսային (ինտերակտիվ) մանկավարժություն, որտեղ հարցերն ու բանավեճերը համարվում էին ուսուցման գործընթացի անբաժանելի մաս: Տարրական դպրոցից հետո՝ մոտավորապես 12–13 տարեկանում, այն տղաները, որոնք ցուցաբերել են սովորելու ունակություն, շարունակել են ուսումը Բեթ Թալմուդում, որը մեր ժամանակների ավագ դպրոցն է: Այստեղ նրանք խորանում էին Թորայի մեկնաբանությունների մեջ, որոնք հայտնի են որպես Միշնա՝ հղկելով քննարկումներ վարելու,

Սուրբ Գիրքը մեկնաբանելու իրենց մտավոր ունակությունները:

Այս ժամանակահատվածում ի հայտ եկավ կրթության մեկ այլ ձև՝ Բեթ միդրաշը կամ ուսուցման տունը, որը ծառայում էր որպես բարձրագույն կրթության հարթակ, որտեղ վարդապետները քննարկում և մեկնաբանում էին հրեական օրենքի բարդ կետերը: Բացի պաշտոնական ուսուցումից՝ տղաները ձեռք էին բերում նաև գործնական հմտություններ, որոնք անհրաժեշտ էին առօրյա կյանքում, օրինակ՝ արհեստ, որը հաճախ ժառանգվում էր իրենց հայրերից: Հիսուսի դեպքում Նա պետք է ատաղձագործություն սովորեր Դավթից:

Հիսուս միշտ քարոզում էր հասարակական վայրերում և, հետևաբար, հայտնի էր հայրենի Գալիլեայի շրջանից շատ հեռու: Ենթադրվում է, որ հրեական ավանդական կրոնական համայնքը դա վտանգավոր է համարել հրեական գրությունների հեղափոխական մեկնաբանության պատճառով և, ըստ երևույթի, պետք է հեռացվեր ճանապարհից: Կարծիք կա, որ Նրան ձերբակալեցին ոչ թե հռոմեացիները, այլ հրեական առաջնորդող շերտը, որն էլ ի վերջո Նրան հանձնեց հռոմեացիներին: Պատմության ավարտը հայտնի է. Պոնտացի Պիղատոսը Հիսուսին մահվան դատապարտեց խաչելության միջոցով:

Սիրվարդ ՍԵՓԱՆՅԱՆ, ք. գ. ք.

ՔՐԻՍՏՈՆԵՈՒԹՅՈՒՆԸ ԵՎ ՀԱՅ ՄՇԱԿՈՒՅԹԸ

Տաթևի վանքը՝ հոգևոր-մշակութային կենտրոն

Իր ամրակուռ բերդերի, անառիկ ամրոցների, մեծաքանակ զինված ուժերի և ռազմապաշտպանական իզորության շնորհիվ Սյունիք աշխարհին առանձնահատուկ հռչակ է վայելել ու հսկայական նշանակություն ունեցել Մեծ Հայքի տարածքային ամբողջականության պահպանման և պետական սահմանների անասանության ապահովման գործում: Լեռնաստանը միաժամանակ ծանրակշիռ ավանդ է ունեցել Հայաստանի հոգևոր-մշակութային կյանքում՝ նպաստելով հայալեզու դպրության, գիտության, մատենագրության, թարգմանական գրականության զարգացմանը և ազգային ինքնության ու ավանդույթների պահպանմանը:

IX դ. վերջին քառորդին Սյունյաց իշխանանիստ Շաղատ գյուղաքաղաքից Տաթևի վանք է տեղափոխվել Սյունյաց վարդապետարանը: Տաթևը դարձել է Սյունյաց աշխարհի հոգևոր-մշակութային ամենանշանավոր կենտրոնը:

Վանքը մատենագրական աղբյուրներում հանդիպում է նաև Ս. Եվստաթես առաքյալի ուխտ անունով (ըստ ավանդության՝ վանքը կոչվել է Թադեսո առաքյալի աշակերտ Եվստաթեսի անունով): Վանական համալիրն ամբողջացնում են պարսպապատերը, ձիթանը, Ս. Պողոս-Պետրոս տաճարը, Ս. Աստվածածին մատուռ-եկեղեցին, Ս. Գրիգոր եկեղեցին, Սուրբ Գրիգոր Տաթևացու դամբարանը, «Գավազան» հուշարձանը, սեղանատունը, դասասենյակները, մատենադարանը, ուխտագնացների հյուրատունը, բնակելի տարածքները, խոհանոցը, բազմաթիվ ծառայողական շինություններն ու վանական խցերը: Ըստ պատմիչ Ստեփանոս Օրբելյանի՝ Տաթևի վանքի առաջին եկեղեցին կառուցվել է IV դ. և ունեցել պարզ տեսք, սակավաթիվ ճգնավոր միաբաններ: Արդեն VIII դ. վերջերին Տաթևը դարձել է Սյունյաց եպիսկոպոսության աթոռանիստը: Տարբեր աղբյուրների համաձայն՝ Տաթևում են պահվել բազմաթիվ սրբություններ (Քրիստոսի խաչափայտի մասունքով արծաթե հսկա (մարդաչափ) «Բաբկենյան խաչը», որը պատրաստել էր Սյունյաց Բաբիկ իշխանի որդի Վասակը), Ս. Հովհաննեսի, Ս. Ստեփանոս Նախավկայի, տասնմեկ առաքյալների, Ս. Գրիգոր Լուսավորչի, Ս. Հռիփսիմի մասունքները, Աստ-



վածածնի մագերը, ինչպես նաև Բյուզանդիայից բերված «Աստվածամուկ Ս. Նշանը»:

Տաթևի վանական համալիրի Ս. Պողոս-Պետրոս եկեղեցուն պահպանվել է X դ. որմնակարչական ամբողջական հարդարանքը, որը պատկերացում է տալիս միջնադարյան հայկական եկեղեցիների նկարագրողման համակարգի մասին: Պատկերներում արվել են հայկական որմնակարչությանը հատուկ 3–4 մմ հաստության սվաղի վրա՝ տեղական բնական հանքաներկերով, մասնավորապես՝ լազվարդով: Խորանի կոնքում պատկերված է եղել «Քրիստոսը փառքի մեջ» տեսարանը: Կոր պատի վրա՝ երեք նախշերիզված շարքերով կամարների ներքո, ներկայացված են մարգարեները, առաքյալները և Հայոց եկեղեցու հայրերը՝ սրածայր խոյրերը գլխներին: Առաքյալների շարքում կենտրոնական պատուհանի հյուսիսային և հարավային կողմերից, նկարված են Հովհաննես Մկրտիչը և Աստվածամայրը՝ Քրիստոսի հետ կազմելով «Դեիսուսի» պատկերաթուղթը: «Դեիսուսը» (հուն.՝ δέσιος (դեիսիս) — խնդրանք, աղաչանք բառից) կամ «Բարեխոսությունը» պատկերազարկում հայտնի թեմա է միջնադարյան արվեստում, որը կապված է Փրկագործության խորհրդի

հետ: «Դեիսուսը» սրբապատկեր է կամ սրբապատկերների խումբ, որի կենտրոնում Հիսուս Քրիստոսի պատկերն է, իսկ Նրանից աջ և ձախ կողմերում Մարիամ Աստվածածնի և Հովհաննես Մկրտչի սրբապատկերներն են՝ ներկայացված բարեխոս աղոթողի ավանդական կերպարով (եռակերպար դեիսուս): Կարող է իր մեջ ընդգրկել առաքյալների պատկերներ, սուրբ հայրերին, մարտիրոսներին և այլոց (բազմակերպար դեիսուս): Դեիսուսյան արվեստի հիմնական իմաստը միջնորդող, բարեխոսական աղոթքն է: Աստվածամոր հետ կապված «Բարեխոսություն» դասական թեման (գահին մատած Ամենակալ Քրիստոս, ձախից՝ Աստվածամայրը, աջից՝ Հովհաննես Մկրտիչը՝ որպես բարեխոսներ) հետագայում շարունակվել է խաչքարերի վրա: «Դեիսուսի» թեման ավելի բարդ ու մուր և իմաստներ է ստացել կիլիկյան մանրանկարչության մեջ: Խորանի համդիսավոր հորինվածքին հակադրված է արևմտյան պատի «Ահեղ դատաստանի» խիստ դիմամիկ տեսարանը, որից պահպանվել են կենտրոնական և ստորին հատվածները. որոշ դրվագներ վերականգնել են 1950–ական թթ. Լ. Դուռնովոյի արած վավերագրական պատճեններով և սխեմատիկ վերակազմու-

թյամբ: Տեսարանն ամբողջական մեծ հորինվածքում ներառում է «Ահեղ դատաստանը» և «Փրկչի երկրորդ գալուստը» ըստ Մատթեոսի Ավետարանի (24.30–31) ու Հովհաննեսի Հայտնության գրքի: Վերևում պատկերված է եղել «Երկնային դատաստանը»: Քրիստոս-Դատավորին երկու կողմից շրջապատել են առաքյալները. Պողոսը՝ Քրիստոսի աջ կողմից, և Պետրոսը՝ ձախ, առանձնացած: Գահի տակ երկու բացված գրքեր են, որոնցով, ըստ Հովհաննեսի Հայտնության, պետք է դատվեին մեռյալները (20.12): Հորինվածքի միջնամասն զբաղեցնում են երկու մեծ հրեշտակներ՝ տեքստերով գալարակները ձեռքներին, աջ գալարակի վրա Հայտնության գրքի խոսքերն են՝ «Եկա... մեռելների ժամանակը, որ դատվեն» (11.18): Աջ կողմում դրախտի Կենաց ծառն է, ձախ կողմում՝ դժոխքի հրե գետը, որն այստեղ մասամբ կապույտ է, ինչպես Հայտնության գրքի «կենդանի ջուրը» (22.1): Հորինվածքի ամենաուշագրավ մասը ստորին հատվածն է՝ ծածկված մեռելների հարության տեսարանով: Դեն նետելով դագաղների կափարիչները՝ Փրկչի երկրորդ գալուստյան դատին են ելնում, կանգնում մեռելները. նրանց կետրոնում են Ադամն ու Եվան: Հյուսիսային պատին պատկեր-

ված «Ծննդյան» հորինվածքից պահպանվել են պատուհանների մեջտեղի երկու հատվածները՝ «Մանկան լողանքը» և «Հովիվների ավետումը»:

Որմնակարների ոճն ընդգծված արտահայտչականությամբ դրսևորվում է կերպարների ձգվածությամբ, բարդ կեցվածքով ու դիրքերով, տարամասշտաբայնությամբ, դիմագծերի, ժեստերի ընդգծվածությամբ, գծային կառուցվածքների քմահաճ խաղով: Գունային գամման արտասովոր է սպիտակի առկայությամբ, տոնային մուր բազմերանգները հարաբերակցված են բաց փիրուզագույն և կապույտ հիմնագույներին: Գեղարվեստական այս ոճը, ինքնատիպ պատկերավորությունը, կերպարների դասականացված շունչը եզակի են հայ արվեստում և մերձեցնում են IX–XI դդ. իտալական այն որմնակարներին ու խճանկարներին, որոնք իրենց մեջ կրում են կարողնեցյան և վաղբրիստոնեական արվեստի ավանդույթները:

Տաթևի վանքի որմնակարները գեղարվեստական բարձր արժանիքների և ինքնատիպության շնորհիվ բացառիկ նշանակություն ունեն միջնադարյան արվեստի պատմության համար, մանավանդ որ X դ. եվրոպական որմնակարներ գրեթե չեն պահպանվել:

Տաթևի վանքը միշտ էլ հիացմունքի ու ներշնչանքի անսպառ աղբյուր է եղել բոլոր այցելուների համար: Իրենց ստեղծագործություններում Տաթևի հույակերտ վանքը ու համալիրի հուշարձանների առանձին մանրամասներ, շրջակայքն ու Տաթևին առնչվող իրադարձություններ են պատկերել կերպարվեստի նշանավոր վարպետներ Փանոս Թերլեմեզյանը, Հակոբ Կոջոյանը, Եվգենի Լանսերեն, Եղուարդ Իսաբեկյանը, Հովհաննես Չարդարյանը, Շավարշ Վաղարշակյանը, Դեղձանիկ Մխիթարյանը, Սուրեն Պիպոյանը, Գրիգոր Շարբաբջյանը, Գուրոսը (Գուրգեն Պարոնյան-Հովսեփյանը), Փարավոն Միրզայանը և այլք:

Այժմ էլ մեծ ժողովրդականություն է վայելում Սյունյաց մեծագույն աշուղ Աշոտի «Սերս վանքում Տաթևի» հոգեթով սիրերգը.

«Սերս վանքում Տաթևի՝ մոմեր վառած կաղոթեր,
Մոտեցա, որ համբուրեմ, ասաց՝
տղա՛, ամոթ է... »:

Արման ՄԱԼՈՅԱՆ, պ. գ. թ.

Սարկավագուհի Հռիփսիմե Թայիրյան: Անտիպ նամականի

Հռիփսիմե Թայիրյան՝ պարկեշտ ու խոնարհ, անարատ ու լուսեղ անհատականություն, բարեգության և արդարության մարմնացում՝ արժանի առաքյալի լուսապսակի:

Ծնվել է 1849 թ. մարտի 18-ին: Հոր՝ հայտնի գործարար և բարեգործ Ալեքսանդր Թայիրյանի ցանկությամբ փոքր հասակից գտնվել է Թիֆլիսի Ս. Ստեփանոս կուսանաց անապատի Գայանե Բեհրությանց մայրապետի անմիջական դաստիարակության և հսկողության ներքո: Սարկավագուհի է ձեռնադրվել 1874 թ.: Եղել է Կուսանաց անապատի աչքի ընկնող միանձնուհիներից մեկը: Իր բարեգործությունների և առաքինի վարքի համար կաթողիկոսների կողմից Հռիփսիմե Թայիրյանը պարգևատրվել է լանջախաչով, ականակուռ խաչով, մատանիով, իսկ Երուսաղեմի Հարություն պատրիարքը նրան շնորհել է շքեղ ոսկե խաչ՝ կենաց փայտի մատուցելով: Մկրտիչ Ա Խրիմյան Կաթողիկոսի կոնդակով 1904 թ. նշանակվել է մայրապետ Եփրոսիմեա սարկա-

վագուհի Աբամելիքյանի օգնական: 1911 թ. հոկտեմբերի 14-ին անապատի իրավասուների ընտրության և Վրաստանի ու Իմերեթի հայոց թեմի ժամանակավոր կառավարիչ Եփրեմ եպիսկոպոսի առաջարկության համաձայն՝ սինոդը Հռիփսիմե սարկավագուհուն հաստատել է Ս. Ստեփանոս կուսանաց անապատի մայրապետի պաշտոնում: Մայրապետական պաշտոնն ստանձնելուց հետո էլ Հռիփսիմե Թայիրյանը շարունակել է բարեսիրական գործունեությունը՝ միաժամանակ հոգ տանելով կուսանոցի կառավարման ու բարգավաճման համար: Իր մայրապետության հենց առաջին ամիսներին իշխան Գ. Բեհրությանի կողմից անապատի անունով մի մեծ հողատարածք նվեր ստացվեց Շղմեթ գյուղում, որի վրա կարժ ժամանակահատվածում, շնորհիվ Հռիփսիմե մայրապետի ջանքերի, կառուցվեց մի հույակապ շինություն, որը նախատեսված էր իբրև միաբան քույրերի ամառանոց:

Ազգին ու Հայոց եկեղեցուն իր կյանքը նվիր-

աբերած Հռիփսիմե Թայիրյանը մահացել է 1934 թ.: Հիշատակն արդարոց օրինությամբ եղիցի:

Սիլվա ՍՈՒՔԻԱՍՅԱՆ,
գրող, հրապարակախոս

ՄԵԾԻ ՏԱՆՆ ԿԻԼԻԿԻՈ ԿԱԹՈՂԻԿՈՍ
ՍԱՀԱԿ Բ-Ի ՆԱՄԱԿԸ ԹԻՖԼԻՍԻ
ԿՈՒՍԱՆԱՑ ԱՆԱՊԱՏԻ ՄԱՅՐԱՊԵՏ
ՀՈՒՓՈՒՄԵ ԹԱՅԻՐՅԱՆՑԻՆ

24 մայիս 1912 թ.

ՍԱՀԱԿ ԾԱՌԱՅ ՀԻՍՈՒՄԻ ՔՐԻՍՏՈՆԻ ԵՒ ԱՆՀԱՍԱՆԵԼԻ ԿԱՍՕՔՆ ԱՍՏՈՒԾՈՅ ԵՊԻՍԿՈՍԱՊՏԵՒ ԿԱԹՈՂԻԿՈՍ ԱՍԵՆԱՅՆ ՀԱՅՈՑ ՄԵԾԻ ՏԱՆՆ ԿԻԼԻԿԻՈՅ

Սրբասուն Հռիփսիմեանց կուսկ. Թայիրյանց և Սօր Կուսանաց Անապատին Տիֆլիսաց, Ուխտակիր և Հոգևոր դատեր մերոց և համայն կուսանաց, որ ընդ խնամով ձերով,

ողջոյն և օրհնութիւն ի մէջ և ի նահատակաց Կիլիկիոյ:

Գերապատիւ Յակոբ Աշոտ եպիսկոպոսի գրութենէն տեղեկացանք Ձեր գանգատներուն, թէ յերուսաղէմ կնքուած անմոռացութեան ուխտերմիս մոռցած ենք և չենք յիշեր զՁեզ և չենք գրեր Ձեզ: Մասամբ միայն իրավացի են Ձեր գանգատները: Սակայն պաշտօնը և բարձր տիտղոսը չեն պատճառ մոռացութեան, որքան մեր տեսած և կրած տառապանքները: Լալու և ողբի ատեն միթէ կարելի է յիշել ուրախ և զուարթ օրերը, Երուսաղէմ իր բոլոր նուիրական և տնօրինական յիշատակներով խեղճութեամբ ի Կիլիկիա յաշխարհին արեան և աւերի: Այսպիսի եղերական պարագաներու մէջ միթէ իրաւունք կը տաք Ձեզ գանգատելու, թէ մոռցած ենք:

Չը գիտենք Աւետարանն ալ չը լուսաբաներ, արդեօք Դագարոսը երբ յարութիւն առաւ չորեքօրեայ մեռելութիւնէ ճանջցաւ իր քոյրերը, կամ ըստ առաջնոյն եղբայրական միևնոյն աղապատանքն ունեցաւ: ➡ էջ 8

Բարու և չարի գիտության ծառը

← էջ 3

Նա տեսնում է այն, ինչ արել է, և հայտարարում է այն «լավ» (օրինակ՝ ԾՆՆ. 1:10) կամ «շատ լավ» (ԾՆՆ. 1:31) կամ «ոչ լավ» (ԾՆՆ.2:18): Ավելի ուշ Սուրբ Գրությունները հաստատում են այս օգտագործումը, ինչպես՝ երբ Աստված նախագգուշացնում է Լաբանին՝ Հակոբի դեմ բարու կամ չարի դատավճիռ կայացնելուց առաջ. «Աստված գիշերը երազում ասորի Լաբանի մոտ եկավ և ասաց նրան. «Ձգուշացիր, որ Հակոբի հետ ոչ լավ և ոչ վատ չխոսես»» (ԾՆՆ. 31:24): Նմանապես Թեկուեից մի կին Դավթին անվանում է որպես մեկը, ով կարող է դատել բարու և չարի միջև. «Թող իմ տեր թագավորի խոսքը մխիթարություն լինի, որովհետև իմ տեր թագավորը նման է Աստծու հրեշտակի, որը հասկանում է ամեն բան՝ բարին և չարը, և թող քո Տեր Աստվածը քեզ հետ լինի» (Բ Թագ. 14:17): Դավիթ թագավորի որդին՝ Սողոմոնը, աղոթում է իմաստության պարզելի համար՝ «բարին և չարն իրարից զանազանելու» (Գ Թագ 3:9): Նոր Կտակարանում եբրայեցիներին ուղղված թղթի հեղինակը ցանկանում է, որ եկեղեցին հասունանա՝ մի կողմ դնելով մանուկների սնունդը և անցնելով իսկական հոգևոր սնուցմանը, որպեսզի նրանք կարողանան տարբերել բարին և չարը. «Որովհետև ամեն մեկը, ով կաթնակեր է, արդարության խոսքին անփորձ է, քանի որ երեխա է: Իսկ պինդ կերակուրը կատարյալների համար է, որոնց զգայարանները վարժված են բարին ու չարը զանազանելու» (Եբր. 5:13–14): Հետևաբար, օձը չի սխալվում, երբ ասում է կնոջը, որ այդ ծառից ուտելով՝ մարդը կնմանվի Աստծուն (ԾՆՆ. 3:5), ոչ էլ կինն է սխալ գնահատական տալիս. մեծագույն անտեսանելի (լատենտ) մեղքը, որը ծածկված է խոսքի ենթախորքում, Աստծու հնազանդությունից դուրս գալն է և ինքնամեծարմամբ ապրելը:

Հին Կտակարանի եբրայական բնօրինակում այս ծառի անունը բառացիորեն կոչվում է «բարու և չարի» ծառ (עץ הטוב והרע / tov vara-թով վառա): Այստեղ կարող է օգտագործված լինել խոսքի ոճական հնարքներից, ոճական դարձույթներից մեկը, որը զուգորդում է հակադիր հասկացությունները՝ ընդհանուր իմաստ ստեղծելու համար, այնպես



«Ադամ և Եվա», Տիցիան, 1550 թ.

որ «բարի և չար» արտահայտությունը պարզապես ենթադրում է ամեն ինչ: Սա եբրայերենում տարածված մի ձև է, որը կանոնավոր կերպով օգտագործվում է Աստվածաշնչում մահվան դատավճիռներ պատկերող նկարագրություններում: Նույն իմաստն է ընկած եգիպտական «չար-բարի» արտահայտության մեջ, որը սովորաբար օգտագործվում է «ամեն ինչ» նշանակությամբ: Այնուամենայնիվ, եթե բարու և չարի գիտության ծառը պետք է հասկանալ որպես ծառ, որի պտուղը ամեն ինչի մասին գիտելիք է հաղորդում, այս արտահայտությունը պարտադիր չէ, որ լինի բարոյական հասկացություն:

Բարու և չարի գիտության ծառի վերաբերյալ առկա են բազմաթիվ մեկնություններ և զուգորդություններ. այն կարող է նշանակել իմաստություն, ամենագիտություն, սեռական գիտելիքներ, բարոյական խտրականություն, հասունություն և այլն:

Տրված գիտելիքն իսկապես բարու և չարի իմացության, զանազանման գիտելիք էր, բայց այն գիտելիք էր, որը տրված չէր Աստծու կողմից: Անկումից հետո գիտելիքն սկիզբ է

առնում, սնվում մեղավոր ես-ից, որին հայում են Ադամն ու Եվան՝ Աստծուն հայելու փոխարեն, երբ բացվում են իրենց աչքերը. «Եվ նրանց երկուսի աչքերը բացվեցին, և իմացան, որ մերկ են, և թզենու տերևներ կարեցին ու իրենց համար ծածկոցներ շինեցին» (ԾՆՆ. 3:7): Հետագայում բարին և չարը զանազանելու՝ ողջ մարդկության կարողությունը շեղվում է յուրաքանչյուրն ամուսն է այն, ինչ ճիշտ է իր աչքում (տես Հռոմ. 2:14, Բ Օրին. 12:8, Դատ. 17:6):

Մարդկությունն օտարվում է Աստծուց, աստվածային ներգործուն աշխարհից, մարդիկ մեկը մյուսից և սեփական ինքնությունից: Սա շատ իրական և ծանր մահ է: Մահը, որը մարմնի կենսաբանական գործառնության դադարեցումն է, հետևանքն է մի աշխարհի, որտեղ մարդն այլևս անհաղորդ է Կենաց ծառին, և որտեղ արդարությունը հաստատված է Աստծու գիտությունից դուրս: Ճիշտ է՝ Ադամը և ամբողջ մարդկային ցեղը ենթակա եղան մահվան՝ բարու և չարի գիտության ծառի պտուղն ուտելուց հետո, սակայն մահը, որը կկրեր նախամեղանշական մարդը, նման կլիներ այն փոխակերպիչ առանձնացմանը, որին ենթարկվում է տղամարդը կնոջ ստեղծման ժամանակ (ԾՆՆ. 2:21–25): Խորքում (երբայերեն՝ תַּרְדֵּמָה – tardema- տառնեմա), որի մեջ Աստված դնում է Ադամին, դատապարտված վիճակ է, մահվան նման խավարային ու սառնաշունչ, և Աստված նրա մարմնից պոկում է մի մաս: Ադամը արթնացումից հետո հասկանում է, որ ամբողջ աշխարհն այլ է, իսկ ինքն՝ այլ. նա նույնիսկ մոր անուն ունի (ԾՆՆ. 2:23): Հին աշխարհը, որում նա մեռակ էր, այլևս չկա, և առաջանում է մոր ու ավելի ամբողջական աշխարհ, որտեղ նա մեռակ չէ: Նմանապես ժամանակին պտուղն ուտելու դեպքում մահը կհանգեցներ մի տեսակ անդրանցման, որն աշխարհում ավելի պարզ ձևի ավարտ կլիներ, բայց այդ փոփոխությունն էլ կհանգեցներ մորից հարության: Թեև մարդը կարող էր, ամշուշտ, մեռած լինել, նա անպայման հարություն կառնե՞ր՝ փառքից փառք անցնելով: Սակայն փոխարենը, ինչպես պատմվում է Ծննդոց գրքում, Ադամի և Եվայի զավակները մահից մահ են շարժվում՝ մինչև ջրհեղեղը:

Անկմանը հաջորդող իրադարձությունները

րից տեղեկանում ենք, որ Ադամն ու Եվան և նրանց միջոցով մահ ամբողջ մարդկությունը դատապարտվում է հարապտույտ տառապանքների: Մարդը պետք է մշակի այն հողը, որից նա ստեղծվել է, մինչև վերադառնա այնտեղ (ԾՆՆ. 3:17), իսկ Եվան պիտի ծննդաբերի ցավով (ԾՆՆ. 3:16): Եվ նա կծնի սերունդ, որը կբարձրանա և կջախջախի օձի գլուխը (ԾՆՆ. 3:15):

Աստծու փրկագնման ծրագրում օգտագործվում են արարչագործության պատկերները: Ադամը, ապավինելով Աստծու խոստումներին, իր կնոջը տալիս է մոր անուն՝ «Եվա», որը նշանակում է «բոլոր ողջերի մայրը» (ԾՆՆ. 3:20): Նա մոր սերմացու բույս է, որի Որդին կյանք կբերի աշխարհին և կկրի իր հոր՝ Ադամի՝ փշերից հյուսված թագը (ԾՆՆ. 3:18): Որպես մոր Ադամ՝ Նա նույնպես կբացի Իր կողքը (Հովհ. 19:34) և կկախվի ծառից, ինչպես հասունացած պտուղը: Նա է, Ով կգա՝ Իր կյանքը տալու աշխարհի կյանքի համար (Հովհ. 6:51)՝ ոչ միայն որպես ուսուցիչ կամ բուժող, այլև որպես Աստծու խոսք, որը կերակուր է՝ դրախտի Հաց (Հովհ. 6:32–33):

Հիսուս Քրիստոսի խաչը ևս աղետակցվում է Այգու երկու եզակի ծառերի պատմությանը: Խաչը մոր Կենաց ծառն է, որով Աստված կերակրում է Իր ժողովրդին և Իր հավիտենական կյանքն ապրում նրանց հետ: Հիսուսը մեզ ավելին է առաջարկում, քան պարզապես մարմնական սնունդը, քանի որ մենք նույնպես միայն հացով չենք ապրում: Նա մեզ առաջարկում է Ինքն Իրեն, Որ Հոր Խոսքն է (Հովհ. 1:14): Հիսուս Քրիստոսի խաչն ամբողջացնում է մահ բարու և չարի գիտության ծառը: Քրիստոսի՝ դեպի խաչելություն զնալուց անմիջապես առաջ էր, երբ պոռնացի կուսակալ Պիղատոսը, որին վստահված էր բարու և չարի գիտությունը, վստահված էր դատել և դատավճիռներ կայացնել, Հիսուսին հարցնում է. «Ի՞նչ է ճշմարտությունը» (Հովհ. 18:38): Օրենքների և իրավունքի գիտակ անձը, որը կոչված է հանրային վճիռներ կայացնելու և պաշտպանելու արդարությունն ու ճշմարտությունը, գտնվում է ամենևին այլ բևեռում՝ անկարող ճշմարիտ և ուղղամիտ դատավճիռ կայացնելու. նա հեռու է ճշմարտությամբ և աստվածահաճ իմաստությամբ գործելուց:

ՕՖԵԼՅԱ ԳԱՄԱՐՅԱՆ
Նաբեկ սրկ. ԳԱՄԱՐՅԱՆ

Մարկավագուհի Հռիփսիմե Թայիրյան: Անտիպ նամականի

← էջ 7

Մենք ալ կոտորած է և մեռելությի՞ն հրաշքով ազատեցանք և տակալին նոյն սարսափներով կ'ապրինք: Այս անյիշատակ արհաւիրքներէն շատ առաջ, երբ շնորհաւորած էիք մեր կաթողիկոսութիւնը, կամ ճիշտ մեր մոր խաչակրութիւն, անմիջապէս պատասխանեցինք, որուն օրինակը ի վկայութիւն կը ներփակենք, այնուհետև Ձեզմէ ոչ մէկ տող ընդունեցինք, սակայն մտքով յանցուցինք, որ մոռցած ըլլաք զմեզ:

Բաւական է այսքանը անցեալին համար. ի սրտէ կուրախակցինք Ձեր մոր պաաշտօնին կամ Կուսանաց Անապատի Մայրութեան կոչումին վրայ, և կը մաղթենք, որ արժանապէս և արդիւնաւորապէս կատարէք այդ ծանր պատասխանատու պաշտօնը:

Պարտքեր ունեիք Դուք առ Էջմիածին և Երուսաղէմ և լիովին կատարեցիք, արդէօք պարտք չէք զգար Ձեր մէջ դէպի Կիլիկիան, որ մեր վերջին թագաւորներու թագն ու փառքն եղաւ և այժմ մեր Ազգի ողջակիզման նուիրական սեղանը, որուն չորս կողմը բիրաւոր երկսէն որբեր մայրական զուգուրանքի պէտք ունին, հազարաւոր այրիներ անձիւրեաց կ'սպասին քրոջական խանդաղատանքի. եկեղեցիներ, վան-

քեր, դպրոցներ քարուքանդ օգնող ձեռքերու կ'սպասին, ասոնց կարգին Հայրապետական Մայր Տաճարն ալ անշքացած վերանորոգութեան կարօտութիւն ունի: Գրեցինք և հրատարակել տուինք այս. մեծ և անյետաձգելի պէտքը, բայց գործնական ոչ մէկ պատասխանի չարժանացանք: Մեր միակ փափագն է, որ առաջին օրինակը դուք տաք և անուննիդ և Ձեր ազգատոհմի յիշատակը անմահացնէք Ռութիւնեանց պանծալի անուններու շարքին մէջ:

Ի խնդրուածս վասն երջանկութեան տառապակիր Ազգին մերոյ Սիրելոյ

Աղօթարար
Սահակ Բ. կաթողիկոս Կիլիկիո

Մատենադարան

Տ. ՍԱՀԱԿ ԵՊԻՍԿՈՊՈՍԻ ՆԱՍԱԿԸ ԹԻՖԼԻՍԻ Ս. ՍՏԵՓԱՆՈՍ ԿՈՒՍԱՆԱՅ ԱՆԱՊԱՏԻ ՄԱՅՐԱՊԵՏ ՀՈՒՓՈՒՍԵ ԹԱՅԻՐՅԱՆՑԻՆ

7 հոկտեմբեր 1896 թ.

ԲԱՐԵՇՆՈՐՀ ՄԻԱԳ ՍԱՐԿԱԲԱԳՈՒՅԻ ԿՈՅՈՒՅՈՒՄԵ ԹԱՅԻՐԵԱՆՑ

Հոգևոր Քոյրդ իմ ի Քրիստոս Երկար ժամանակ եղաւ, որ ոչ

Դուք և ոչ ես չենք գրեր. չը գիտեմ թէ Ձեր կողմից ինչ պատճառ ունիք. քանի որ ես Ձեր բոլոր նամակները անպատասխանի թողած չեմ և վերջին գրողը ես եղած եմ: Եթէ տկար չէք, միւս պատճառները այնքան նշանակութիւն չունին: Գուցէ վերջին գրութիւնս ընդունած չէք և այնքան զարմանալի բան չէ, քանի որ աշխարհի շատ խռովեալ վիճակ մը ունի: Ինչ որ լինի, Ձեր վիճակը համեմատաբար երջանիկ կը համարուի, իսկ մերինը... բաւ կը պակսի որակելու: Վերջին նամակս գրելու ատեն տակալին բռնի մը կը նմանէր մեր կացութիւնը, բայց այժմ աւելի քան դառնագոյն է. չունինք ոչ մի կերպով ապահովութիւն, աղքատութիւնը մեծ վտանգ կը սպառնայ ազգի դարաւոր իրաւանց. շատ տեղերում Երուսաղեմապատկան կալուածները քանդուեցան և այրեցան, իսկ անվնաս մնացած տեղերում ալ հասարակութեան չքաւորութեան երեսից դատարկուած են. ուխտաւոր չունինք և ապագայում ևս ունենալու յոյս չունինք: Ով գիտէ, որքան երկար պիտի տևէ այս աղետալի կացութիւնը, որուն դառն հետևանքը պիտի լինի Ս. տեղաց մէջ հայոց միաբանութիւնի և վանքերու անշքութիւնը ու քակորումն ու քանդումը:

Աստուծոյ ամենաբաւական այ-

ցելութիւնը հասնի առաջ տառապեալ ազգին, ապա մեզ:

Չեմ կարծեր, որ Դուք էլ շատ հանգիստ լինեք. Ձեր ուսումնարանական հարցն էլ ծանր է և շատ վտանգներ կը սպառնայ ազգային ինքնուրոյնութեան. ի՞նչ նպատակ ունէր և ինչ հետևանք ունեցաւ օտար դաւանութիւնից պաշտօնէին այցելութիւնը, ի Ս. Էջմիածինս:

Խեղճ Հայրիկ, ինչ սև սիրտի — վիճակի ցաւ իւր կաթողիկոսութիւնը. ինչ ցաւեր և խոցեր արդեօք ճնշած են այդ անպարտելի սիրտը, որ երկար ժամանակ է վեր տող մի գիր անգամ չը գրեց այս կողմը և երեք ամիս եղաւ որ «Արծաղանք» չենք ստանար. երկի Յունկարեն հաշուվելով երկու օրինակի համար բաժանորդագրութեան պայմանաժամը վերջացած սեպել են. իրաւունք ունին եթէ այս պատճառաւ դադարեցուցած են. նոքա էլ հացի խնդրով պէտք է պարտատրին, քանի որ ժամանակը ամենի համար դառնացած է, ուստի կը խնդրին, որ բաժանորդագրութիւնը վերանորոգեք իմ հաշուով և ապսպրէք խմբագրութեան, որ միայն մի օրինակ իմ անուամբ և վիճենայի ճանապարհու ղրկին այն թիւն սկսեալ, յորմէ դադարեցուցած են, յուսալով, որ այս նեղութիւնն էլ սիրով յանձն կառնուք և կը կատարէք: Շնորհա-

կալութիւնս եղբայրական սիրով ողջունելով զհոգևոր Քոյրդ իմ

Մնամ աղօթարար
Սահակ Եպսկ.

Մատենադարան

**Հրատարակության պատրաստեց
Սիլվա ՍՈՒՔԻԱՅԱՆԸ**

**ՔՐԻՍՏՈՆՅԱՆ
ՀԱՅԱՍՏԱՆ**

Կրոնական, մշակութային,
լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»
թերթի խմբագրությունը

Գլխավոր խմբագիր՝

Նարինե Հովհաննիսյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com
qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/

kristonya-hayastan

Ստոր. տպագր. 16.08.2024 թ.

Տպաքանակը՝ 1265